

ՏԻԳՐԱՆ ՀԱՅԱԶՆ



ՀԱՅԿԱԿԱՆ ԻՇԽԱՆԱԿԱՆ  
ՋԻՆԱՆՇԱՆՆԵՐԸ



ՏԻԳՐԱՆ ՀԱՅԱԶՆ

ՀԱՅԿԱԿԱՆ  
ԻՇԽԱՆԱԿԱՆ  
ՉԻՆԱՆՇԱՆՆԵՐԸ

(Գկարագրական փորձ)

գիրք առաջին



Երևան  
2005

ՀՏԳ 929.6 /479.25/

ԳՄԴ 63.2 Հ

Հ 246

**Հ 246 ՏԻԳՐԱՆ ՀԱՅԱԶՆ, ՀԱՅԿԱԿԱՆ ԻՇԽԱՆԱԿԱՆ**  
ՁԻՆԱՆՇԱՆՆԵՐԸ /նկարագրական փորձ/, գիրք առաջին: Եր.:  
Հեղինակային հրատարակություն. 2005.- 96 էջ: Գծապատկերները՝  
Վարդուհի Գրիգորյանի:

Գիրքը երկար տարիների որոնումների արդյունք է: Այն հայկական իշխանական  
զինանշանների նկարագրական փորձ է: Ներկայացվող զինանշաններով  
ամբողջական պատկերացում կարելի է կազմել Հայոց իշխանական տների, նրանց  
ուժի ու ոգու հաստատումը հանդիսացող զինանշանային պատկերագրության և  
իշխանական տների ժառանգորդության մասին:

Գրքի այս պրակի նյութերի զգալի մասը տպագրվել է 1989-1990 թվականներին  
«Պիոներ կանչ» թերթում, ինչպես նաև մասնակի հավելումներով 2001 թ.  
հրատարակված «Հայկական իշխանական զինանշանները» գրկույկում:

Գիրքը նախատեսված է Հայոց պատմության մասնագետների և ընթերցող լայն  
հասարակության համար:

ԳՄԴ 63.2 Հ

ISBN 99930-4-347-7

© ՏԻԳՐԱՆ ՀԱՅԱԶՆ, 2005

© ՊԵՏՐՈՍՅԱՆՑ, Հ. Տ. 2005

Մեր մեծագույն պատմիչ  
Մովսես Խորենացին հաղորդել է,  
որ Քրիստոսի ծննդից առաջ, 2492 թվականին  
հայ ազգի անվանադիր Հայկ Նահապետը  
Խոշաբ գետի ափին հաղթել է Բելին  
և Ժամանակի ու Պատմության մեջ  
ապահովել  
Հայոց տեղը:

**2008 թվականին լրանում է  
Խոշաբի հաղթանակի 4500 - ամյակը:**

## ԲՈՎԱՆԴԱԿՈՒԹՅՈՒՆ

ՀԱՅԿԱԿԱՆ ԻՇԽԱՆԱԿԱՆ ՁԻՆԱՆՇԱՆՆԵՐԸ.....	5
ԱՐԱՐԱՏՅԱՆ ԹԱԳԱՎՈՐՈՒԹՅԱՆ	
ՁԻՆԱՆՇԱՆԸ.....	6
ԱՐՏԱՇԵՍՅԱՆ ՏԻԳՐԱՆ ՄԵԾԻ ՁԻՆԱՆՇԱՆԸ.....	9
ԳՆԹՈՒՆԻՆԵՐԻ ՁԻՆԱՆՇԱՆԸ.....	11
ԿԱՄՍԱՐԱԿԱՆՆԵՐԻ ՁԻՆԱՆՇԱՆԸ.....	14
ԲԱԳՐԱՏՈՒՆԻՆԵՐԻ ՁԻՆԱՆՇԱՆԸ.....	16
ԿԱՐՍԻ ԳԱԳԻԿ ԹԱԳԱՎՈՐԻ ՁԻՆԱՆՇԱՆԸ.....	20
ԱՆԻ ՔԱՂԱՔԻ ՁԻՆԱՆՇԱՆԸ.....	22
ԿՅՈՒՐԻԿՅԱՆՆԵՐԻ ՁԻՆԱՆՇԱՆԸ.....	26
ԱՐԾՐՈՒՆԻՆԵՐԻ ՁԻՆԱՆՇԱՆԸ.....	29
ՍՅՈՒՆԻՔԻ ԹԱԳԱՎՈՐԱԿԱՆ ՏԱՆ ՁԻՆԱՆՇԱՆՆԵՐԸ.....	34
ԿԼԻԿԻԱՅԻ ՀԱՅՈՅ ԹԱԳԱՎՈՐՈՒԹՅԱՆ	
ՁԻՆԱՆՇԱՆԸ.....	38
ՁԱՔԱՐՅԱՆՆԵՐԻ ՁԻՆԱՆՇԱՆՆԵՐԸ.....	44
ՎԱՀՐԱՄՅԱՆՆԵՐԻ ՁԻՆԱՆՇԱՆԸ.....	51
ՎԱՉՈՒՏՅԱՆՆԵՐԻ ՁԻՆԱՆՇԱՆՆԵՐԸ.....	54
ԱՁԻՁԲԵԿՅԱՆՆԵՐԻ ՁԻՆԱՆՇԱՆԸ.....	59
ԴՄԵՂԻ ՄԱՍԻԿՈՆՅԱՆՆԵՐԻ ՁԻՆԱՆՇԱՆԸ.....	61
ՀՈՆԵՆՅ ՏՈՂՄԻ ՁԻՆԱՆՇԱՆԸ.....	65
ԽԱՂԲԱԿՅԱՆՆԵՐԻ ՁԻՆԱՆՇԱՆԸ.....	69
ՕՐԲԵԼՅԱՆՆԵՐԻ ՁԻՆԱՆՇԱՆՆԵՐԸ.....	74
ՇԱՀՈՒՆՆԵՅՈՅ ՁԻՆԱՆՇԱՆԸ.....	80
ՄՇԿԱՎԱՆՔԻ ՁԻՆԱՆՇԱՆԸ.....	82
ԱՎԱՆԻ ՍՈՒՐԲ ՀՈՎՀԱՆՆԵՍ ԵԿԵՂԵՑՈՒ ԽՈՐԱՆԻ	
ՁԻՆԱՆՇԱՆԸ.....	84
ՀԱՄԱՆ-ՁԱԼԱԼԻ ՁԻՆԱՆՇԱՆԸ.....	86
ԱՌԻՆՁԻ ՁԻՆԱՆՇԱՆՆԵՐԸ.....	89
ՄԵԼԻՔ ԵԳԱՆԻ ՁԻՆԱՆՇԱՆԸ.....	92


## ՀԱՅԿԱԿԱՆ ԻՇԽԱՆԱԿԱՆ ՁԻՆԱՆՇԱՆՆԵՐԸ

**Ձ**ինանշանը (գերբ) պատմական ավանդույթներ արտահայտող տարբերանշան է: Այն ծագել է գերմաներեն «Erbe» բառից և նշանակում է ժառանգություն: Հայ իրականության մեջ գործածվում է զինանշան քառը:

Ձինանշանը հատուկ է պետություններին, պետության մաս կազմող տարածքային միավորումներին (նահանգ, գավառ, քաղաք), համընթացություններին, ազնվականական ու իշխանական տոհմներին, առանձին մարդկանց և արտացոլում է աշխարհագրական, վարչական, տնտեսական, կենցաղային, անհատական առանձնահատկություններ: Պատկերվում է դրամների, մեդալների, դրոշմների, ռազմի առարկաների, կառույցների վրա:

Ձինանշանը ծագել է մարդկության պատմության արշալույսին՝ կենդանիների, տոտեմների, տոհմի պահպանման պաշտամունքի հաստատումով: Ավելի ուշ, երբ կազմավորվեցին պետական միավորումները, պետությունները, երբ ձևավորվեցին իշխող տոհմերը, զինանշանը խորհրդանշական առավել ընդգծված տեսք ու իմաստ ձեռք բերեց և դարձավ ժառանգաբար փոխանցվող տարբերանշան:

Աշխարհի հնագույն ժողովուրդների մասն՝ հայերը ևս, սկսած վաղնջական ժամանակներից՝ ստեղծել են տարբերանշան-զինանշաններ: Հայկական լեռնաշխարհում պահպանված ժայռապատկերների պատկերագրության շատ տարբեր այնուհետև մի քանի հազարամյակ անց կրկնվել և տեղ են գտել պեղումներով հայտնաբերված մ.թ.ա. 3-րդ-1-ին հազարամյակների պաշտամունքային, կենցաղային, ռազմի առարկաների վրա: Դրանք Հայկական լեռնաշխարհի բնիկների՝ հայերի էթնիկական միասնության ու հաջորդայնության աներկբայելի հաստատումն են:



## ԱՐԱՐԱՏՅԱՆ ԹԱԳԱՎՈՐՈՒԹՅԱՆ ՁԻՆԱՆՇԱՆԸ

Հայկական լեոնաշխարհում պետական առանձին միավորումների մասին պատմական տեղեկություններ կան շումերական արձանագրություններում՝ սկսած մ.թ.ա. 28-27-րդ դարերից: Շումերական, արքադական, ասորական արձանագրություններում Հայկական լեոնաշխարհի տարածքում հիշատակվում են Արատտա, Արմանի, Արմե-Շուպրիա, Հայասա-Ազգի, Նաիրի, Բիայնա, Ուրուատրի (Արարատի) պետական կազմավորումները:

Վերջինիս էլ, մ.թ.ա. 10-րդ դարից սկսած՝ վիճակվեց ամբողջ Հայկական լեոնաշխարհն ընդգրկող պետականություն կերտողի, ազգաստեղծ դժվարին դերը:

Ատրեստանի Աշշուրնաձիրապալ արքան մ.թ.ա. 9-րդ դարում թողել է Արարատյան թագավորության վերաբերյալ առաջին տեղեկությունները: Այնուհետև Սալմանասար Գ արքան ձեռնարկել է հինգ արշավանք դեպի Արարատյան թագավորություն, որտեղ իշխում էր Արամեն:

Մ.թ.ա. 840-825 թվականներին Արարատում գահակալել է Սարգուրի Ա-ն, որը հիմնադրել է Տուշպա (Վան) մայրաքաղաքը: Նրա օրոք վերջնականապես կազմավորվեց Արարատյան թագավորությունը:

Մ.թ.ա. 825-786 թվականներին իշխում են Իշալուինին և Մեմուան: Նրանց գահակալության ժամանակաշրջանում երկիրն Ատրեստանի հետ ռազմական կոնֆլիկտ չի ունեցել: Խաղաղության տարիները հնարավորություն տվեցին երկրում կարևոր բարեփոխումներ կատարել:

Դրանք առնչվում էին երկրի կենսագործունեության բոլոր բնագավառներին: Դրանցից կարևորագույնը ռազմական ռեֆորմն էր, որն իրագործվեց լեզվի միասնականացման, հողի վերաբաժանման, իրավանթակայական բարեփոխումների հետ փոխկապակցված:

Ձեռնարկված բարեփոխումներն արգասաբեր եղան: Եվ Արգիշտի Ա-ի օրոք (մ.թ.ա. 786-764 թթ.) ջախջախիչ պարտություն կրելով նրանից՝ Ասորեստանն իր գերիշխանությունն Առաջավոր Ասիայում զիջեց Արարատյան թագավորությանը: Մ.թ.ա. 782-ին Արարատյան դաշտում Արգիշտի Ա-ն հիմնադրում է Լրեբունի-Երևան քաղաքը, իսկ մ.թ.ա. 776-ին՝ Արգիշտիիխինիլի քաղաքը: Արգիշտի Ա-ի օրոք Արարատյան թագավորությունը դարձավ գերտերություն:

Սարդուրի Բ-ն (մ.թ.ա. 764-735/34 թթ.) շարունակեց հոր գործունեությունը, սակայն մ.թ.ա. 743-ին Արփաղ քաղաքի մոտ պարտվեց Թիգլաթպալասար Գ-ից:

Մ.թ.ա. 714-ին Մանայի վրայով Արարատյան թագավորություն ներխուժեց Սարգոն Բ-ն, որը դաժան ավերածություններ կատարեց ողջ երկրով մեկ: Առանձնապես ծանր էր նրա կողմից հոգևոր կենտրոն Մուսասիրի գրավումն ու թալանը: Մուսասիրի ավերման աղետը Ռուսա Ա-ին սղեց ինքնասպանության:

Արգիշտի Բ-ին (մ.թ.ա. 713-685 թթ.) հաջողվում է կարճ ժամանակում հզորացնել երկիրը: Նրան հաջորդած Ռուսա Բ-ն, որը իշխեց մինչև մ.թ.ա. 645 թվականը, շարունակեց հոր քաղաքականությունը: Նա Արարատյան դաշտում կառուցեց Թեյշեբախնի հզոր քաղաքը: Մ.թ.ա. 645-625 թվականներին երկրում իշխում էր Սարդուրի Գ-ն:

Մ.թ.ա. 617-ից իշխել է Ռուսա Գ-ն, որն իրեն անվանել է Լրիմենայի որդի: Մ.թ.ա. 609-590-ական թվականներին գահակալել է Արարատյան թագավորության հայտնի վերջին արքան՝ Ռուսա Դ-ն:

Արարատյան թագավորության երեքհարյուրամյա պատմության կարևորագույն նվաճումը հայ ժողովրդի՝ որպես ազգային ամբողջականության ձևավորումն է: Դրանով պետք է բացատրել Արարատյան թագավորական տոհմի անկումից անմիջապես հետո՝ գրեթե նույն սահմաններում, Երվանդունիների իրավահաջորդությունը:

Լրեբունի ամրոցի դրյակի պատերին, պեղումներով Լրեբունի, Թեյշեբախնի քաղաքներից գտնված արքայական վահանների վրա առկա են մի քանի տարբերակներ, որոնցից հիմնականը կենտրոնում ներճկված կողերով քառակուսու ներսում արև-հավերժություն խորհրդա-

նշող, քառակուսու երկու կողմերում գլխով դեպի արև-հավերժությանը նայող երկու առյուծների պատկերն է:

Չափազանց խոսուն է Էրեբունի ամրոցի դրյակի պատին պահպանված որմնանկար-զինանշանը, որը նաև հետաքրքիր գունային լուծում ունի:

Ընդհանուր պատկերը լաջվարդ կապույտ ֆոնի վրա է: Ներձկված կողերով քառակուսին իրականացված է գորշ կարմրադեղով և ներսում ու կենտրոնում ձևավորված է ծիրանագույն կետավոր շրջանակներով: Քառակուսու ներսում կողային եզրերից սկսվող ծիրանագույն շրջանակ է, որի վրա պատկերված է 16 ճառագայթից բաղկացած արև: Արևի ճառագայթները մեկընդմեջ կապույտ և գորշ կարմրադեղով են: Արևի հիմքը նույնպես կարմրադեղով իրականացված շրջանակ է, որի ներսում դարձյալ ծիրանագույն շրջանակ է գծված:

Արև-հավերժության երկու կողմերում պատկերված են գլխով դեպի արևը շրջված վեհատես արու առյուծներ: Առյուծներն իրականացված են ծիրանագույն գույնով և սև եզրագծերով: Պատկերված են քայլ անելու դիրքով: Բաց երախը, դեպի վեր տնկված պոչերը, հրացայտ աչքերը,



եղևանախշի միջոցով իրականացված, ցցված ելուստներով բաշերը խորհրդանշում են առյուծների հզորությունն ու ուժը՝ արև-հավերժություն-երկիր հայրենին պահելու վճռականությունը:


Ամենայն հավանականությամբ, գունային այս լուծումները Արարատյան թագավորների դրոշի գույներն են:

Այս հիմնական տարբերակին զուգահեռ՝ բացարձակ նույն գունային լուծումներով



իրականացված են նաև այլ տարբերակներ: Նույն արև-հավերժության մի կողմում առյուծով, մյուս կողմում՝ ծնկածալ, մարտի պատրաստ միաեղջյուր ցուլի պատկերով, ինչպես նաև նույն արև-հավերժության երկու կողմերում նույն ծնկածալ ցուլերի պատկերով զինանշանն է:

## ԱՐՏԱՇԵՍՅԱՆ ՏԻԳՐԱՆ ՄԵԾԻ ԶԻՆԱՆՇԱՆԸ



Հայաստանում Արտաշեսյանների արքայատոհմն իշխել է մ.թ.ա. 189-ից մինչև մ.թ. I թվականը:

Արտաշեսյան արքայատոհմի հիմնադիրը Արտաշես Ա-ն է: Մ.թ.ա. 189 թ. Մազնեսիայի ճակատամարտում Սելևկյան թագավորության պարտությունից հետո, նա Հայաստանը հայտարարել է անկախ պետություն:

Արտաշես Ա-ն արձանագրություններում իրեն անվանել է «Երվանդական», որով փաստել է տոհմակցական կապը մ.թ.ա. 590 թվականից Հայաստանում իշխող Երվանդունի արքայատոհմի հետ:

Արտաշես Ա-ն վերամիավորել է Հայաստանից անջատված կամ խլկած ծայրագավառները և ստեղծել միաձույլ, համագգային պետություն:

Արտաշեսյան արքայատոհմի ամենաականավոր ներկայացուցիչը Տիգրան Բ Մեծն է, որի օրոք Հայաստանը դարձել է Մերձավոր Արևելքի ամենահզոր պետությունը: Նրանից սկսած՝ Արտաշեսյան արքաները կրել են «արքայից արքա» տիտղոսը, իսկ Տիգրան Բ-ն՝ նաև «Աստված» պատվանունը:

Հռոմի հետ պատերազմներում՝ մ.թ.ա. 69-66 թվականներին, Տիգրան Բ-ն կորցրել է նվաճած հողերը, բայց պահպանել Մեծ Հայքի անկախությունն ու ամբողջականությունը:

Տիգրան Մեծի որդին՝ Արտավազդ Բ-ն, և թողը՝ Արտաշես Բ-ն, զոհվել են Հռոմի կայսրության դեմ մղվող պայքարում:

Տիգրան Բ-ի և նրա հաջորդների պայքարը Հռոմի դեմ ունեցել է նաև հելլենիստական առաջավոր քաղա-քակրթությունը պաշտպանելու նպատակ:

Արտաշես Բ-ի մահից (մ.թ.ա. 20 թ.) հետո արքայա-տոհմն անկում է ապրել, իսկ մ.թ. I թվականից հեռացել է պատմությունից:

Արտաշեսյան տոհմի զինանշանն առկա է այդ արքայատոհմի ներկայացուցիչների կտրած դրամներին՝ թագի վրա: Լավագույն օրինակը պահպանվել է



Արտաշեսյան Տիգրան Բ Մեծի թագի վրա: Այն իր արմատներով հարագատ է Արարատ-յան արքայատան զինանշանին և իրենից ներկայացնում է հետևյալ պատկերը. կենտրոնում ութաթև աստղ է, որը խորհրդանշում է արևը՝ հավերժությունը, նրա աջ և ձախ կողմերում մեկական արծիվներ են, որոնք պոչով հենված են աստղի հիմքին և զվարճ շրջված են դեպի արևը: Արծիվը ուժի և իմաստության խորհրդանիշն է: Եվ այս դեպքում էլ արքայատոհմի ներկայացուցիչները զինանշանը որդեգրելիս համոզմունք են ունեցել, որ հավերժությունը (արև) կարող է գոյություն ունենալ միայն ուժով (արծիվներ):

Ինչպես և այլուր, Արտաշեսյան տարբեր արքաների պարագայում ևս, առկա են զինանշանային տարբերակներ, օրինակ՝ Տիգրան Բ-ի որդի և հաջորդ Արտավազդ Բ-ն նույն տիգրանյան թագի վրա կրել է միայն ութաթև աստղի նշանը:

Արտաշեսյան զինանշանը պատկերված է Հայաստանի Առաջին Հանրապետության և Հայաստանի Երկրորդ Հանրապետության զինանշանների վրա (վահանի աջակողմյան ստորին հատվածում):



## ԳՆՈՒԹԻՆՆԵՐԻ ՉԻՆԱՆՇԱՆԸ

Հայկական հնագույն նախադարական տոհմերից է Գնթունիների իշխանական տունը: Գնթունիների մասին հիշատակություններ կան Մովսես Խորենացու, Փավստոս Բուզանդի, Եղիշեի, Ղազար Փարպեցու, Մեքենայի, Հովհաննես Գրասխանակերտցու, վրաց Անանուն պատմիչի (9-րդ դար), Ստեփանոս Տարոնացու (Ատոլիկ), Սամուել Անեցու, Ստեփանոս Օրբելյանի և հետագա պատմիչների երկերում: Գրավոր վկայությունների շարքը լրացնում են Ապարանում, Չովունիում, Անձափում, Օղուզլոյում (Անի քաղաքի մոտ) փորագրված փյունագիր արձանագրությունները: «Գահնամակի» համաձայն՝ Գնթունիները Հայոց ալրոնիքում զբաղեցնում էին 21-րդ գահը, իսկ «Չորանամակի» համաձայն՝ ներգրավված էին հայկական բանակի հյուսիսային զորախմբի մեջ և ունեին 300 հեծյալ զինվոր:

Գրավոր աղբյուրների համաձայն՝ Գնթունիները մեկ հազարամյակից ավելի իշխել են պատմական Նիզ գավառում (ներկայումս՝ Ապարանի, Արագածի, Եղվարդի, Աշտարակի հյուսիս-արևելյան տարածաշրջանում) և որոշակի ներդրում ունեցել համահայկական քաղաքական, զինական և մշակութային կյանքում:

Մովսես Խորենացին գրում է Հայոց Աբգար թագավորի օրոք՝ 1-ին դարում զործած Չորա Գնթունու մասին, իսկ Փավստոս

Բուզանդը հիշատակում է, որ Արշակ Արշակունին 353-357 թվականների միջև հռոմեական կայսեր մոտ բանակցելու ուղարկված դեսպանախմբում ընդգրկել է Դեմետ Գնթունուն: 400 թվականին պարսից Վրան արքան Սամ Գնթունուն նշանակել է Սյունյաց նահապետ: 9-րդ դարի վերջերին Հասան Գնթունին Բագրատունիների թագավորության գորահրամանատարն էր, իսկ Աշոտ և Վասակ Գնթունիները նույն շրջանում նշանակվել էին Գուգարքի կառավարիչներ:

Ավարայրի ճակատամարտին մասնակցել և իր 19 զինվորների հետ նահատակվել է Տաճատ Գնթունին, իսկ տոհմի մեկ այլ իշխան ճակատամարտից հետո տարվել է պարսից արքայի ատյան: Այս տոհմից կարող է լինել 630-641 թվականներին Ամենայն Հայոց կաթողիկոս Եզր Փառաժնակերտցին:

Գնթունիների մեծագույն ներդրումը քրիստոնեական վաղ շրջանի հոգևոր շինությունների կառուցումն է: Քասաղ գետի երկայնքով նրանք 4-5-րդ դարերում կառուցել են Քասաղի, Ջարջարիսի, Ջովունիի (երեք), Աստվածընկալի, Ափնայի, Եղիպատրուշի, Բուժականի միանավ ու եռանավ եկեղեցիներն ու տաճարները: Եզր Փառաժնակերտցի կաթողիկոսը կառուցել է Էջմիածնի Գայանե, իսկ Հասան Գնթունին՝ Անի քաղաքի մոտ գտնվող Օղուզու գյուղի հոյաշեն եկեղեցիները:

Գնթունիները պատմության թատերաբեմից հեռացել են 930-ական թվականներին:

Գնթունիների զինանշանը փորագրված է նրանց տոհմական նստավայրում՝ Ապարան քաղաքում 4-րդ դարի սկզբներին կառուցված Քասաղի բազիլիկ տաճարի արևմտյան մուտքի բարավորի վրա:

Գնթունիների զինանշանային քանդակն իր նկարագրով կրկնում է Արարատյան թագավորների և Արտաշեսյանների զինանշանային պատկերագրության ձևը: Ինչպես առաջինները՝ ունի երկայնակի ուղղանկյուն կառուցվածք: Կենտրոնում, հավերժության և ութաթև աստղի փոխարեն, տեղադրվել է այդ ժամանակաշրջանին հատուկ հավասարաթև խաչ, որը վերցվել է կյոր շրջանակի մեջ և իր հերթին օղակվել է խաղողի ողկույզներով: Խաչի երկու կողմերում քանդակված են գլխով դեպի խաչը շրջված արու եղջերուներ: Եղջերուները քանդակված են քայլ անելու դիրքով. այդ են վկայում առջևի բարձրացրած և քայլի պատրաստ ոտքերը: Եղջերուները կանգնած են իրենց թևկունքից մինչև խաչի շրջանակի ներքին հատվածը ձգվող գծի վրա: Գծերի տակ, երկու կողմերում, դարձյալ փորագրված են խաղողի ողկույզներ:


Այս պատկերաքանդակի զինանշան լինելու լավագույն

հաստատումը եղջերուների մարմնի կենտրոնական մասում, մարմնից վերև կենցաղ ծառերի քանդակներն են:

Ջինանշանի գծային ուղղանկյունը նույնպես եզրափակվում է կլոր շրջանակների մեջ փորագրված խաղողի ողկույզներով:

Գնթունիների զինանշանը իրականացված է խոր փորվածքով, կենդանիների և առարկաների իրատեսական պատկերագրությամբ:

## ԿԱՄՍԱՐԱԿԱՆՆԵՐԻ ՁԻՆԱՆՇԱՆՆԸ



**Կ**ամսարականները միջնադարի հայկական նշանավոր տոհմերից են: Ավանդությունը վկայում է, որ Կամսարականները սերում են պարթև կամ պահլավ Կարենյան տոհմից: Իբր պարսից Սասանյանները կոտորել են այդ տոհմի ներկայացուցիչներին, սակայն կոտորածից փրկված Պերոզամատի որդի Կամսարը հեռացել է Հայաստան, և Հայոց արքա Տրդատ Մեծը նրան պարգևել է արքունական Շիրակ և Երասխաձոր գավառները, և որ այս Կամսարի անունով էլ տոհմը կոչվել է Կամսարականք: Նախարար Կամսարի ավագ որդու՝ Արշավիր Ա-ի անունով Երասխաձոր գավառը, ինչպես նաև երբեմն տոհմը կոչվել են Արշարունիք: Ավանդությունը ավանդություն, սակայն եթե անգամ ճիշտ լինի Կամսարականների պարսկական ծագումը, այնուամենայնիվ, նրանք իրենց հայրենիքի՝ Հայաստանի իսկական գավակներն էին և վաղ միջնադարում իրենց գործուն ներդրումն են ունեցել ինչպես հայկական քաղաքակրթության, հայրենիքի պաշտպանության, այնպես էլ հայոց մշակույթի զարգացման գործում:

Կամսարական տոհմի ներկայացուցիչները բարեկամական սերտ կապերով էին կապված Արշակունի և Մամիկոնյան տոհմերի հետ և աչքի էին ընկնում արիությանբ: Նրանք հայոց բանակի կազմում մարտադաշտ էին հանում 600 հեծյալ զինվոր:

8-րդ դարի սկզբներից, Կամսարականները, որ հիմնականում հունական կողմնորոշում էին որդեգրել, քայլ առ քայլ սեղմվում են այս շրջանում հզորացող Բագրատունիների կողմից և, չկարողանալով հակադրվել նրանց, 8-րդ դարի վերջերին Շիրակն ու Արշարունիքը վաճառում են Բագրատունիներին ու հեռանում Փոքր Ասիա և Բյուզանդիա:

Կամսարականների տոհմի ներկայացուցիչներն աչքի են ընկել շինարարական ու մշակութամաստ գործունեությամբ: Ներսես Գ-ն է

կառուցել Թալինի Կաթողիկե և Սուրբ Աստվածածին եկեղեցիները: Կամսարականներն են հովանավորել Մրենի տաճարի, Կամրջածորի վանքի (նույնացվում է ժամանակակից Ջոր գյուղի եկեղեցու հետ), Խժկոնքի համալիրի Սուրբ Կարապետ եկեղեցու, Ծպնի գյուղի եկեղեցիների (բոլորն էլ այժմ գտնվում են Թուրքիայի տարածքում) կառուցումը: Կամսարականներն են հիմնադրել Բագրատունյաց Հայաստանի ապագա մայրաքաղաք Անին:

Կամսարական տոհմի զինանշանի վրա ցույի (գուցե՝ եզան) պատկերն է դաջված եղել (հատկանշական է, որ «կամսար» բառը պարսկերեն նշանակում է «եզան զուխ ունեցող»): Մեզ հասած միակ օրինակը պահպանվել է Ծպնիի եկեղեցում: Այս եկեղեցին գտնվում է Կարսի մարզում. Նախիջևան գյուղի հյուսիս-արևմտյան կողմում: Այն և՛ արտաքուստ, և՛ ներքուստ խաչաձև գմբեթավոր եկեղեցի է: Կառուցվել է 7-րդ դարում: Եկեղեցիների այդ տիպին են պատկանում Արթիկի շրջանի Լմբատավանքը և Ապարանի շրջանի Լուսագյուղի Վերի վանքը:

Եկեղեցու ներսում այլ պատկերների թվում փորագրված է Կամսարականների զինանշան-հարթաքանդակը: Այն զբաղեցնում է շարաքարերից զգալիորեն մեծ մի ամբողջական քարի երեսը: Յուրը պատկերված է կանգնած՝ զլխով՝ ձախ ուղղությամբ: Կենդանին հզոր կառուցվածք ունի, ողնաշարը ուղիղ ու ձիգ է, ոտքերը ամուր ու կորովի, զլխով շրջված է դեպի դիտողը: Արտաքին նշաններից երևում է, որ ցուլը ցանկացած վայրկյան պատրաստ է հարձակման ու հարվածի: Այդ են հաստատում աչքերի ոռած ելուստները, հուր ցայտելու պատրաստ ոունգերը, վզի ձգվածությունը, դեպի վեր ծոված առջևի ոտքը (ցուլը մարտից առաջ միշտ ոտքով փորում է գետինը) և ձգված պոչը: Յուլի պատկերը շարժուն է, թափանցիկ, կենդանի, թեև քանդակագործը ոչ մի մանրամասն չի շեշտել. բացի կենդանու եղևնանախշ պարանոցից:

Որդեգրելով ցուլի պատկերը՝ Կամսարականները, հավանաբար, իրենց վերագրել են առասպելական ուժի, աննկուն կռվողի, ցանկացած նպատակ իրագործողի խորհրդանիշ-գաղափարներ, որոնք լիովին կարողացել են ապացուցել իրենց հայրենամարտի գործունեությամբ:



## ԲԱԳՐԱՏՈՒՆԻՆԵՐԻ ԶԻՆԱՆՇԱՆԸ

Հայոց պատմական տոհմերից մեկին՝ Բագրատունիներին մեծ առաքելություն վիճակվեց: 9-րդ դարի 50-ական թվականների կեսերին Արաբական խալիֆայությանը ենթակա Հայաստանի կառավարիչ նշանակված Աշոտ Բագրատունին, հենվելով իր տոհմի ռազմական ուժի վրա, համախմբելով ազատատենչ իշխանական տները՝ 3 տասնամյակում քայլ առ քայլ գնաց դեպի անկախություն: Եվ վերջապես՝ 885թ. վերականգնեց 428թ. կորսված Հայաստանի անկախությունը և մեծ շուքով օծվեց Հայաստանի թագավոր:

Բագրատունիների հայոց թագավորությունն իր հզորության բարձրակետին հասավ Գագիկ Ա թագավորի օրոք՝ 989-1020 թվականներին, երբ կրկին վերանվաճվեցին Դվինն ու Նախնավանը, և Երասխը կրկին սահման դարձավ Հայաստանի և Ատրպատականի միջև:

Սակայն 11-րդ դարի 20-ական թվականներից հետո իրադրությունը փոխվեց: Արևելքից եկել ու սպառնում էին սելջուկների հրոսակները, արևմուտքից նվաճողական առաջխաղացումն էին համառորեն շարունակում անհեռատես բյուզանդական կայսրերը, որոնք, փաստորեն, իրենց ձեռքով ավերում էին արևմուտքի ճանապարհը պաշտպանող վահանը՝ Հայաստանը: 1045թ. բյուզանդական կայսրը խաբեությանը Կ. Պոլիս է հրավիրում Գագիկ Բ թագավորին, որ դիմագրավում ու հետ էր մղում բյուզանդական բանակներին, և գերում է նրան: Ընկնում է Բագրատունիների 160-ամյա թագավորությունը:

Բագրատունիների քազավորության տարիներին առաջացան Վասպուրականի, Կարսի, Սյունիքի, Լոռու քազավորությունները, Խաչեն-Փառիսոսի, Տարոնի իշխանությունները, որոնք ենթակա էին Բագրատունիների կենտրոնական քազավորությանը:

Բագրատունյաց Հայաստանը Միջին Արևելքի ամենածաղկուն երկրներից մեկն էր, առևտրական կապերի մեջ էր հայտնի գրեթե բոլոր երկրների հետ: Այստեղ կառուցվում էին նոր ու ամուր քաղաքներ, մշակույթի ու հոգևոր համալիրներ: 961 թ-ին մայրաքաղաք հռչակված Անին այդ ժամանակի աշխարհի ամենահզոր ու ամենաբազմամարդ քաղաքներից էր:

Հայտնի չէ, թե հնում, երբ Բագրատունիները հայոց Արշակունի քազավորների քազադիրներն էին կամ Մարզպանական Հայաստանի կառավարիչները, ինչ զինանշան ունեին, բայց Հայաստանի քազավոր եղած ժամանակ նրանց զինանշանի վրա առկա են թե՛ առյուծի, թե՛ արծվի պատկերներ:

Բագրատունիների առյուծի պատկերով հնագույն զինանշանը գտնվում է Կարսի Առաքելոց եկեղեցու հարավային ճակատին: Առաքելոց եկեղեցին կառուցվել է Աշոտ Երկաթի եղբոր՝ Աբաս Բագրատունի քազավորի օրոք՝ 930-943 թվականներին: Առյուծի պատկերն իրականացված է հարթաքանդակի եղանակով քարի վրա փորված քառակուսու ներսում: Առյուծը գլխով ուղղված է դեպի աջ և նայում է դիտողին: Որպես իշխանության նշան՝ առջևի աջ թաթը բարձրացրած է վեր, պռչը՝ վեր տնկված: Թեև պատկերն իրականացված է առանց մանրամասների ընդգծման, այնուամենայնիվ, խոսում է: Փաստորեն, լինելով Առաքելոց եկեղեցու պատին, ամենայն հավանականությամբ, զինանշանը պատկանում է Աբաս քազավորին:

Հաղարծին



Աճի



Անիում գտնված սալաքարի վրա առյուծի պատկերը իրականացված է քանդակային եղանակով: Առյուծը գլխով ուղղված է դեպի աջ և բացարձակապես կրկնում է Կարսի քանդակը: Առավել մանրամասնորեն են քանդակված կենդանու կուրծքը, վիզը, դեմքը: Կուրծքը ուռցրած է, բաշը հարթ է, հոնքը հաստ ու ընդգծում է: Ճակատին ռումբիկ է փորագրված, որ խորհրդանշում է իշխանապետ լինելը:

Հենց այս առյուծապատկերն է որպես Բագրատունիների խորհրդանիշ պատկերվել Հայաստանի Առաջին Հանրապետության և Հայաստանի Երկրորդ Հանրապետության զինանշանների՝ վահանի աջակողմյան վերին հատվածում:

Անիում գտնվել են գլխով դեպի աջ ուղղված ևս երկու զինանշանային քանդակներ:

Վստահորեն կարելի է փաստել, որ Բագրատունիների կենտրոնական իշխանության զինանշանը գլխով դեպի աջ ուղղված առյուծի պատկերն է:

Արծվի պատկերով հնագույն զինանշանը ևս գտնվում է Կարսի Առաքելոց եկեղեցու գմբեթի խորշերից մեկում:

Ջինանշան-արծվի քանդակված է արձանային եղանակով և ունի ուղղահայաց կառուցվածք: Թռչնի թևերը հպված են մարմնին, կուրծքը դուրս ցցված է, վիզը թեքված է մի փոքր ձախ, գլուխը ցավոք, ջարդված է: Հզոր ճանկերի մեջ պոչին սեղմած պահում է ինչ-որ անորոշ կենդանու: Քանդակն իրականացված է թեփուկաքանդակային եղանակով:

Բագրատունիների անիական շրջանից հայտնի է զինանշանային մեկ այլ տարբերակ, որը գտնվում է Անիի Մայր տաճարի արևմտյան ճակատին: Այստեղ՝ կենտրոնական մասում, իրար զուգահեռ, երկու խորշերի գլխին, գրեթե մույն ոճով քանդակված են զինանշան-արծվի պատկերները: Թռչունն ունի հորիզոնական կառուցվածք, պատկերված է այն պահին, երբ երկնքից, թևաբախումով, բացված պոչով իջնում ու ճանկում է գոհին: Ամբողջ պատկերը շարժման մեջ է. հզոր թևերը ալիքաձև, ոլորում ճախրում են օդում, մագիլները խրվել են աննշան ու անորոշ գոհի մարմնի մեջ ու սեղմվել են հզոր պոչին: Թռչնի գլուխը մի փոքր ձախ է թեքված եղել, որով որոշվում է նաև կրծքի ձախ ուղղվածությունը: Ինչպես և Կարսում, Անիի Մայր տաճարի երկու արծիվների գլուխներն էլ կտրված են, որով զինանշանային այս անզուգական պատկերները որոշ չափով խամրում են: Ջինանշանային արծվաքանդակները թեև զուրկ են մանրամասների ընդգծումից և

ընդհանրապես մշակված չեն, սակայն լավագույնս արտահայտում են հզոր թագավորների՝ Բագրատունիների կարգավիճակը. նրանք այնքան հզոր են, որ նրանց դեմ թշնամիներն աննշան ոչնչություն են: Բագրատունիների այս զինանշանը կերտվել է Գագիկ Ա թագավորի օրոք, երբ Բագրատունիները գտնվում էին փառքի գագաթնակետին, և նրանց զինանշանն էլ այդ է ապացուցում:



Աճիի Մայր տաճարի զինանշանային պատկերի նմանությամբ՝ երկու նույնատիպ արծվապատկերներ են փորագրված Աճիի միջնաբերդի պալատական եկեղեցու ներսում: Եկեղեցին կառուցել են Բագրատունիները՝ 10-11-րդ դարերում:

Ավելի ուշ Բագրատունիների զինանշանային պատկերները որդեգրեցին իրենց Բագրատունյաց տոհմից սերված համարող՝ նրանց իրավահաջորդ Չաքարյանները: Չաքարե Բ-ի և Իվանե Ա-ի համար որոշ փոփոխություններով օգտագործվեց Կարսի Առաքելոց եկեղեցու արծվապատկերը, իսկ Վահրամյանները որդեգրեցին Աճիի Մայր տաճարին գտնվող զինանշանը՝ դրանում որոշ հավելում կատարելով:



## ԿԱՐՍԻ ԳԱԳԻԿ ԹԱԳԱՎՈՐԻ ԶԻՆԱՆՇԱՆԸ

**963** քվականին Աշոտ Գ Ողորմած թագավորի կրտսեր եղբայր

Մուշեղ Բագրատունին իրեն հռչակեց Կարսի թագավոր՝ ընդունելով Անիի Բագրատունիների թագավորության գերագահությունը: Քաղաքական այս կազմավորումը գոյատևեց մինչև 1065 քվականը, երբ Գագիկ Կարսեցի Աբասյանը, վախենալով սելջուկ-թուրքերի հարձակումներից, Կարսի թագավորության տիրույթները հանձնեց Բյուզանդիային՝ փոխարենը ստանալով Ծամնդավ, Կեսարիա, Խավատանք քաղաք-ամրոցները:

Կարսի թագավորությունն ընդգրկել է շուրջ 10 հազար կմ<sup>2</sup> տարածք. Մեծ Հայքի Այրարատ նահանգի արևմտյան մասը՝ Արաքս գետի վերին, Ախուրյան գետի վերին և միջին հոսանքները:

Կարսի թագավորության մայրաքաղաքը համահայկական նախնին մայրաքաղաք Կարսն էր: Կարևոր կենտրոններ էին նաև Կաղզվան և Կողբ քաղաքները: Չարգացած էին երկրագործությունը, լեռնագործությունը, զինեգործությունը, անասնապահությունը: Արդյունահանվում էր պղինձ, արծաթ, երկաթ, արձիճ, աղ:

Կարսի թագավորներ Մուշեղի և նրա որդի Աբասի զինանշանները հայտնի չեն, իսկ Գագիկ Աբասյանի զինանշանը պահպանվել է նրա իսկ հրամանով ընդօրինակված և այժմ Երուսաղեմում գտնվող

«Ավետարանի» 135 «բ» էջում պատկերված թագավորական ընտանիքի հագուստի վրա:

Գորգածածկ բազմոցին ծալապատիկ նստած են Գագիկ Աբասյան թագավորը, Գորանդուխտ թագուհին և Մարեմ արքայադուստրը:

Պատմական արժեք ներկայացնող այս նկարում թագավորը և նրա ընտանիքի անդամները ներկայացված են ոչ թե սովորական պալատական հանդերձանքով, այլ թագավորական պաշտոնական համազգեստով, որի վրա եղած պատկերները չէին կարող լինել ոչ այլ ինչ, քան զինանշաններ:


Գագիկ թագավորը կրում է կապույտ գույնի երկար պատմուճան՝ լայնաբերան թեզանիքով: Հագուստի վրա ոսկեթելով ասեղնագործված են կլոր մեղալիոններ: Պարզ երևում է իրանի մասում պատկերված շրջանակը: Այստեղ, ինչպես նաև կրծքի վերին հատվածում գտնվող շրջանակի մեջ, ոսկեթելով պատկերված են զլխով դեպի աջ դարձած առյուծներ: Կենդանու պոչը պատկերված է տնկված վիճակում և մեջքի վրայով հասնում է մինչև մարմնի կեսը:

Հետաքրքիր լուծում է տրված զլխի հատվածին. կենդանու զլխին պատկերված է եռաճյուղ թագ, որի կենտրոնական ճյուղն ամբնական երկար ծայրով կեռվում և հասնում է մինչև պոչը: Այս մանրամասնը որոշ պատմաբանների ստիպել է այդ պատկերում տեսնել այծ-քոշի նկարը, որը հավաստի չէ: Առյուծի դնչից կախված է խաչ:

Գորանդուխտ թագուհու և Մարեմ արքայադուստրեր հագուստի վրա նույնպես կլոր շրջանակներ են պատկերված, իսկ նրանց մեջ գործված են դիմահայաց արծիվներ:

Գրեթե 200 տարի հետո նույնպիսի պատկերագրությամբ են ներկայացվել նաև Կիլիկիայի Հայոց թագավոր Լևոն Բ-ի և Կեռան թագուհու հագուստները, որը ևս հավաստումն է այն փաստի, որ Գագիկ Կարսեցի թագավորի հագուստի վրա զինանշան է գործված:

Անի քաղաքի պարսպի  
վրա գտնվող զինանշանը



## ԱՆԻ ՔԱՂԱՔԻ ՉԻՆԱՆՇԱՆԸ

Անին Հայաստանի մայրաքաղաքն է եղել 961-1045 թվականներին:

Անին կառուցվել է Ախուրյան և Անի գետերի միախառնման վայրում՝ կիրճերով պաշտպանված, ծովի մակարդակից 1500 մետր բարձրությամբ հրվանդանի վրա: Քաղաքի տարածքը Հայաստանի հնագույն բնակավայրերից է եղել: Այստեղ պահպանվել են կիկլոպյան պարսպի մնացորդներ, մ.թ.ա. 8-7-րդ դարերի դամբարաններ: Անիի ստորգետնյա քարայրներից մեկում գտնվել է մ.թ.ա. 1-ին հազարամյակի

բրոնզե ապարանջան, քաղաքի տարածքից հայտնաբերվել են Տիգրան Մեծի արծաթյա դրամներ:

Պատմիչներ Եղիշեն և Ղազար Փարպեցին Անին առաջին անգամ հիշատակում են 5-րդ դարում՝ որպես Կամսարական իշխանների ամրոց: 783 թվականին Բագրատունի իշխան Աշոտ Մսակերը Կամսարականներից գնել է Արշարունիք և Շիրակ գավառները՝ Անի ամրոցի հետ:

Կամսարականների շրջանին են պատկանում Աղջկաբերդի և Անիի միջնաբերդի կառույցները: Միջնաբերդը շրջափակված էր բուրգավոր պարիսպներով: Հետագայում դրանք Բագրատունիների կողմից ներառվել են ընդհանուր պաշտպանական համալիրի մեջ:

953 թվականին Աբաս Բագրատունուց գահը ժառանգած Աշոտ Գ-ն, 961 թվականին Անանիա Ա Մոկացի կարողիկոսի ձեռամբ՝ մեծ հանդեսով, բազմաթիվ հյուրերի ու հայոց ողջ բանակի ներկայությամբ թագադրվեց Անի քաղաքում ու Անին հայտարարեց երկրի մշտական մայրաքաղաք:

992 թվականին, Գագիկ Ա թագավորի օրոք, Ամենայն հայոց կաթողիկոս Սարգիս Ա Սևանցին տեղափոխվեց մայրաքաղաք Անի: Եվ Անին ստացավ այնպիսի դեր, ինչպիսին ունեին քրիստոնեական Հայաստանի մայրաքաղաքներ Վաղարշապատն ու Դվինը:

Աշոտ Գ Ողորմածը 963-964 թվականներին կառուցեց քաղաքի ներքին բուրգավոր ու աշտարակավոր պարիսպը: Նրա օրոք անցկացվեց քաղաքի ջրմուղը, կառուցվեցին պալատի որոշ հատվածները: Մայրաքաղաք հայտարարվելուց ընդամենը երկու տասնամյակ հետո Անին արդեն տարածվում էր միջնաբերդից հյուսիս-արևելք ընկած սարահարթի վրա, և Աշոտ Ողորմածի որդի ու հաջորդ Սմբատ



Տիեզերակալը ութ տարվա ընթացքում կառուցեց 2,5 կմ երկարությամբ արտաքին հզոր պարիսպները, ամրացրեց ու ամբողջացրեց Աղջկաբերդի, Անիի միջնաբերդի, Ծաղկոցաձորի, Գլխձորի պարսպահատվածները: Մյաժամանակ ավարտվեց պալատի ամբողջացումը, կառուցվեցին 17 մուտք-դարբասները, Ախուրյանի կամուրջները, իջևանատներ, ամբողջական թաղամասեր ու փողոցներ, բազմաթիվ եկեղեցիներ (Մայր տաճարը, Գազկաշենը, Առաքելոցը, Սուրբ Փրկիչը և այլն), իշխանական ապարանքներ, հիվանդանոցներ, ստորգետնյա քարտուններ: Ամրացնելով Անին՝ Բագրատունիները քաղաքը ևս շրջապատել էին պաշտպանական ամրոց-կայաններով (Մաղասաբերդ, Տիզնիս):

1045 թվականին՝ Բագրատունիների անկումով, դադարեց նաև մայրաքաղաքի հետագա բարգավաճ կյանքը: Անին, թերևս, մի թռիչք էլ ունեցավ Չաքարյանների իշխանապետության մայրաքաղաք եղած ժամանակ (1201-1236 թթ.):

Թշնամիների մշտական ավերածությունների հետևանքով Անին ավերվեց, դատարկվեց ու մոռացվեց: Այսօր Հայաստանի երբեմնի շքեղաշուք մայրաքաղաքի մույնքան շքեղ ավերակները մնում են Թուրքիայի բռնազավթած տարածքում՝ Արաքսի մյուս ափին:

10-11-րդ դարերի այդ ժամանակահատվածում, լինելով աշխարհի խոշորագույն քաղաքներից մեկը համահայոց մայրաքաղաքը՝ Անին, պիտի ունենար զինանշան:

Սմբատ Տիեզերակալը կառուցելով արտաքին մեծ պարիսպները գլխավոր դարբասի մոտ՝ պարսպի վրա տեղադրել տվեց զինանշանի պատկերը:

Այս զինանշանային պատկերը բազմաստիճան ու բարդ է: Ներքևի կամ առաջին աստիճանը կազմում է բարձր շրջանակով ընդհանուր պատից առանձնացված երկհարկ եկեղեցատիպ ուղղանկյուն շրջանակը: Առաջին հարկի կամ մեծ ուղղանկյան մեջ արձանային եղանակով քանդակված է գլխով դեպի ձախ ուղղված հովազ՝ վարզի պահին: Հովազի մարմինը երկայնակի ձգված է, երկար վիզը ձգված է վեր, մեջքը ճկված է ներքև, առջևի ձախ թաթը հետ է ընկած, հետևի մույն ոտքը՝ առաջ, որով ապահովված է հավաստի վարզը, պոչը՝ մարմնին զուգահեռ, ձգված է օդում: Քանդակն իրականացված է հարթ մշակումով: Շրջակալի երկրորդ հարկի քարի վրա կլոր շրջանակ-փոս է փորված, ինչը փոխարինում է գնդին՝ իշխանության նշանին: Երկրորդ հարկի շրջակալի կենտրոնից դեպի վեր,

ինչպես եկեղեցու գմբեթի վրա, գունավոր, ռոմբավոր խաչ է դրված: Խաչը հենված է եռանկյունաձև ռոմբի վրա: Խաչի կենտրոնական ռոմբի կենտրոնում ևս շրջանակ-փոսիկ է փորված՝ որպես իշխանության նշան: Ամբողջ պատկերն իր համաչափության մեջ եկեղեցու կերպարունի:



Անի քաղաքի զինանշանին հետագայում էլ մնացել է հովազը: Այդ է ապացուցում 1273 թվականին Անի քաղաքում պատրաստված փո-



րագրագարդ գրակալի վրայի հովազի պատկերը: Կենդանին այստեղ գլխով ուղղված է դեպի աջ և դարձյալ պատկերված է վարգի պահին: Գլուխը ուղղահայաց դիրքով է, վզի գնդավոր օղակը, ինչպես նաև առջևի աջ քաթի վրա պահված գունդը, իշխանության նշան են: Հովազի մեջքին հենված հիմքի վրա փորագրված է շրջանակավոր վարդյակ, որ փոխարինում է կենաց ծառին և խորհրդանշում է հավերժությունը:





## ԿՅՈՒՐԻԿՅԱՆՆԵՐԻ ՁԻՆԱՆՇԱՆԸ

Հայոց արքա Աշոտ Գ Ողորմածի կրտսեր որդի Գուրգենը (նրա անունը տեղի բարբառով հնչել է նաև «Կյուրիկե», որից էլ տոհմանունը) 970 թվականին հիմնադրեց Կյուրիկյան թագավորությունը, որն ընդգրկում էր Գուգարաց աշխարհի արևելյան գավառները, հիմնականում՝ Տաշիրն ու Չորափորը: Ինչպես Գուրգենը, այնպես էլ նրա հաջորդներն ընդունել են Բագրատունիների կենտրոնական իշխանության գերագահությունը:

Թագավորության մայրաքաղաքն սկզբում Շամշուլդե բերդաքաղաքն էր, որը մինչ այդ էլ Գուգարաց իշխանի կենտրոնատեղին էր: 1065 թվականին Կյուրիկյանները տեղափոխվեցին Լոռե բերդաքաղաք, որը դարձավ թագավորության նոր մայրաքաղաքը:

10-12-րդ դարերում Կյուրիկյան թագավորության տարածքում կառուցվեցին Կայան, Լոռե, Սահկանաբերդ, Գագ բերդերը:

Բագրատունիների կենտրոնական (1045թ.) և Կարսի (1065թ.) թագավորությունների անկումից հետո Կյուրիկյանների թագավորությունը Բագրատունյաց միակ իշխանությունն էր:

1113 թվականին Կյուրիկյան գահակալներ Աբաս Ա-ն ու Դավիթը կորցրեցին կենտրոնական իշխանությունը, թողեցին Տաշիրը և տեղափոխվեցին Տավուշ ու Մաժնաբերդ՝ հիմնադրելով նույնանուն փոքրիկ իշխանությունները:

Կյուրիկյանների մշակութային կենտրոններ Սանահինն ու Հաղբատն իրենց գործունեությամբ համահայկական նշանակություն ունեին:

Կյուրիկյան թագավորական տան զինանշանը պահպանվել է Լոռի բերդը եզերող Ձորագետ գետի վրա կառուցված և հետագայում ավերված կամրջի միջին հենարանի վրա: Լոռե բերդաքաղաքը, ամենայն հավանականությամբ նաև Ձորագետի կամուրջը, կառուցվել են Կյուրիկյան Դավիթ թագավորի օրոք (966-1048թթ.):

Բազալտե շարաքարը, որի վրա պատկերված է զինանշանը, սովորական շարաքարի մեկուկես մեծության է: Սրա վրա քանդակագործական եղանակով պատկերված է գլխով դեպի ձախ դարձած առյուծ, որը նայում է դիտողին: Առյուծի երախը բաց է, ականջները՝ վեր ցցված: Դեմքի արտահայտությունը անհանգիստ է, լարվածություն է արտահայտում: Այդ են ցուցանում նաև փոքր-ինչ կքած առջևի մեկ, հետևի երկու ոտքերը, և հետևի ոտքերի արանքով դուրս եկած ու մարմնի վրայով վեր ցցված պոչը: Թվում է՝ կենդանին ընթացքի պահին ինչ-որ բանից անհանգստացած շրջվել ու լսողություն դարձած քարացել է տեղում:

Այս զինանշանը Կյուրիկյան թագավորության տան զինանշանն է, պատրաստվել է այն ժամանակ, երբ Բագրատունիների իշխանությունն արդեն չկար: Իր վրա կրելով Բագրատունիների հիմնական զինանշանի պատկերը, միաժամանակ չչփոթելու համար՝ առյուծը պատկերվել է մայր զինանշանին հակառակ դիրքով՝ գլխով դեպի ձախ:

Պատկերը զինանշանային է: Եվ դրա վկայությունը վեր ցցված պոչի ծայրի գնդաձև մշակումն է, որը ստույգ իշխանության նշան է:

12-րդ դարի վերջին քառորդում՝ հետթագավորության շրջանում, այս թագավորական ընտանիքի շառավիղները գրեթե միաժամանակ երկու տարբեր կառույցների վրա թողել են զինանշանային պատկերներ:

1170-ական թվականների վերջերին Կյուրիկյան Աբաս թագավորի կինը՝ Չաքարե և Իվանե Չաքարյանների քույրը՝ Վանենին, ամուսնու հիշատակին Դեբեդ գետի վրա կառուցված կամրջի եզրակողերի չորս անկյունները ձևավորել է կատվագլխների ընտանիքի արձանային քանդակներով: Այս քանդակներից մեկը, որ թաթերը կախել է ցած և միացրել իրար, հաստատապես առյուծ է, մյուսները, թվում է՝ հովազ կամ վագր են: Ինչպես առյուծը, հովազը, այնպես էլ վագրերը հարազատ են Վանենու և՛ ամուսնու, և՛ հայրական ընտանիքների զինանշանային պատկերասրահին: Բագրատունի Կյուրիկյաններն

առյուծապատկեր, հովազապատկեր (Անիի խորհրդանիշը), Ջաքարյան-  
ները՝ վագրապատկեր (Մակարավանք) զինանշաններ ունեն:

1181-1184 թվականներին կառուցվել է Սանահինի Ամենափրկիչ  
եկեղեցու գավիթը: Գավթի չորս սյուների կառուցումը հովանավորել են  
Կյուրիկե Բ թագավորի (1145-1170 թթ.) դուստրերը՝ Մարիամը, Բորինան,  
Ռուսուդանը և Կյուրիկե Բ-ի կնոջ՝ Թամարի հորաքույր Ռուսուդանը:

Հորաքույր Ռուսուդանի հովանավորությամբ կառուցված սյան  
խոյակի զամբյուղը չորս անկյուններից երկուսում (խոյակի քառակուսու  
եզրերում) ձևավորված է կենդանիների արձանային եղանակով  
պատրաստված գլուխներով, որոնցից երկուսը կատվազգիների  
ընտանիքին են պատկանում: Կլոր գլխով, փոքրիկ ականջներով, նեղ,  
շեղ աչքերով, բարակ քթով կենդանին հովազ կամ էգ վագր է հիշեցնում:



## ԱՐԾՐՈՒՆԻՆԵՐԻ ՁԻՆԱՆՇԱՆԸ

Արծրունիները Հայկական լեռնաշխարհի բնիկներ են, համաձայն Արարատյան թագավորության ժամանակաշրջանի արձանագրությունների՝ սերվում են Արծրունի տոհմից, որն ապրում էր Վանա լճի արևելյան կողմում՝ Տոսպում: Հետագայում նրանց է անցել մաս Աղբակը, իսկ ավելի ուշ Արծրունիները միավորվելով Մարդպետական տոհմի հետ՝ դարձել են Հայաստանի հզորագույն իշխանատոհմերից մեկը: Արշակունյաց թագավորական «Գահնամակի» համաձայն՝ Արծրունիներն զբաղեցնում էին երեք բարձ (Բագրատունի և Սյունի տոհմերից հետո):

Արծրունիներն իրենց հզորությունն օգտագործելով՝ գերազահություն ձեռք բերեցին ամբողջ Վասպուրական

աշխարհում, և նրանցից վասալական կախվածության մեջ էին Ռշտունի, Անձևացի, Ամատունի, Ակեացի, Տրպատունի տոհմերը, որոնք ևս հետագայում սկսեցին ներկայանալ որպես Արծրունիներ: Սրանով է բացատրվում այն փաստը, որ 850-ական թվականներին Արծրունիները բաժանվում էին 16 ճյուղի:

Արծրունիները իրենց կարողություններով մշտապես եղել են հայրենյաց նվիրյալներ:

Ավարայրի ճակատամարտում հայոց բանակի կենտրոնական գործախմբի հրամանատարը Ներշապուռի Արծրունին էր: Նրանք ակտիվորեն մասնակցել են 480, 774-ական թվականների ազատագրական պատերազմներին, իսկ 851 թվականին Բագրատունիների հետ գլխավորել են Արաբական խալիֆայության դեմ ուղղված ժողովրդական ապստամբությունը:

Արծրունիները, մասնակցելով Բագրատունիների կողմից Հայաստանի անկախ պետականության վերականգնման գործին, միաժամանակ հանդես բերեցին անջատողական դրսևորումներ և 908 թվականին ստեղծեցին Վասպուրականի անկախ թագավորությունը, որն ընդունելով Բագրատունիների գերագահությունը՝ գոյատևեց մինչև 1021 թվականը: Վասպուրականում հաջորդաբար թագավորել են Գագիկ-Խաչիկը, Աշոտ-Դերենիկը, Աբուսահլ-Համազասպը, իսկ 968 թվականից՝ միաժամանակ Աշոտ-Սահակը, Գագիկ-Խաչիկը, Սենեքերիմ-Հովհաննեսը:

Սելջուկ-թուրքերի հարձակումների և Բյուզանդիայի ճնշման հետևանքով Սենեքերիմ-Հովհաննեսը 1021 թվականին Վասպուրականի ազատանու և բնակչության մի մասի հետ գաղթել է Փոքր Հայք, որտեղ կազմավորել է Արծրունիների ավատական իշխանությունը՝ Սեբաստիա կենտրոնով: 1080 թվականին Արծրունիների այս իշխանապետությունը ևս ընկավ:

Արծրունիների որոշ ներակայացուցիչներ հաստատվեցին Կիլիկիայում, մի մասը շարունակում էր գոյատևել Վասպուրականում, ևս մեկ ճյուղ հաստատվեց Հյուսիսային Հայաստանի Կայան գավառում՝ հիմնելով Մահկանաբերդի Արծրունյաց իշխանությունը և ծառայության անցնելով Վրաց արքունիքում՝ հասավ բարձրագույն պաշտոնների: Ավելի ուշ այս տան ներկայացուցիչները խնամախանալով Չաքարյանների հետ՝ շարունակեցին ազդեցիկ դիրք գրավել Չաքարյանների իշխանապետությունում: Թիֆլիսի ամիրապետի և արքունի գանձարանապետի տեղակալի պաշտոններն Արծրունիների ժառանգական պաշտոններն էին:



1250 թվականին՝ Ավագ Չաքարյանի մահից հետո, Սաղուն Արծրունին դարձավ Վրաստանի և Հայաստանի աթաբեկ և ամիրսպասալար: Այս պաշտոնում նրան փոխարինեց որդին՝ Խուրլուբուղան, որը հայտնի վերջին Արծրունի իշխանապետն է:

Արծրունիների տոհմից սերված հոգևորականները 1113 թվականից ժառանգաբար նստել են Աղթամարի կաթողիկոսության գահին: Մատենագիրների կողմից հիշվում են այլ

Արծրունի հոգևորականներ և:

Արծրունիների հնագույն տոհմաճյուղերի, թագավորության տեղեկություններ հայտնի չեն:

Ջինանշանային պատկերներ Գագիկ Արծրունի թագավորի կողմից Աղթամար կղզում 915-922 թվականներին Մանուել ճարտարապետի ձեռքով կառուցված Սուրբ Խաչ եկեղեցու արտաքին պատկերաքանդակներում:

Աղթամարի տաճարի արևմտյան ճակատին, կենտրոնական պատուհանի աջ կողմում պատկերված է Գագիկ Արծրունի թագավորի բարձրաքանդակը: Նա ձախ ձեռքով բռնել է տաճարի մանրակերտը, որը նվիրաբերում է Քրիստոսին:

շրջանի, վաղ միջնադարյան շրջանի զինանշանների մասին

պահպանվել են Վասպուրականի



Արծրունյաց թագավորի հանդերձանքի մանրամասները վերարտադրված են ճշգրիտ: Թագավորը հագած է շրջանակներով ձևավորված պատմունճան: Խլիստ կարևոր է քիկնոցը, որի վրա մեղալիոնների մեջ փորագրված են գլխով դեպի աջ դարձած արծիվներ: Թիկնոցի վրայի արծիվների պատկերներն ապացույցն են այն փաստի, որ Գագիկ թագավորի զինանշանը եղել է արծիվը, այլ պարագայում անհնար է, որ այն պատկերվեր թագավորի քիկնոցի վրա:



Եկեղեցու արևելյան ճակատին պատկերված է խնջույքի տեսարան. կենտրոնում նստած է Գագիկ Արծրունի արքան, Գագիկ թագավորից ձախ, խաղողի երկրորդ որդագալարի մեջ պատկերված է ութաթև աստղի վրա հպարտորեն կանգնած վեհատեսք արծիվ: Արծրունի ինքնանվան հիմքում ընկած է «արծիվ» բառը: Եվ արքայի կողքին պատկերված արծվի քանդակն ինքնին հաստատում է, որ գործ ունենք արքայատան զինանշանային պատկերի հետ: Թռչունը գլխով դարձած է դեպի աջ՝ դեպի Գագիկ թագավորը, թևերը սեղմված են մարմնին: Երևացող թևը ձևավորված է երկու ուղղահայաց, երկու զուգահեռ փոսիկներով: Երկու փոսիկով է ձևավորված դեպի ներքև թեքված պոչը: Մարմնի վիճակն այնպիսին է, որ երևում են կուրծքը, երկրորդ թևի ուսագոտին և երկու ոտքերը: Կտուցը սուր է, աչքը՝ կրկնակի փոսիկով, ավելի ընդգծուն է դարձված:

Թեև պատկերն անպաճույճ ու անզարդ է, սակայն իր վեհատես անմիջականությամբ խիզախություն, նվիրում, սլացք, արագություն, ամենատեսություն է ցուցանում: Արծիվը կանգնած է ութաթև արև-հավերժություն արտահայտող աստղի վրա, որը ևս հաստատում է դրա զինանշանային պատկեր լինելը:

Թեև Արծրունիների ինքնանվանումը հուշում է, որ վերջիններիս խորհրդանշիչի հենքը կարող է առաջին հերթին միայն արծիվը լինել, սակայն Աղթամարի տաճարի զինանշանային քանդակներում առկա առյուծապատկերներն այդպես կարծելու հիմք չեն տալիս: Տաճարի արևելյան ճակատին, Գագիկ թագավորի ձախ կողմում, արծվի պատկերին համաչափորեն հակակշիռ, աջ կողմում պատկերված է առյուծ:

Նույն արևելյան ճակատին, եռանկյունաձև խորշի երկու

կողմերում պատկերված են դիմահայաց առյուծներ: Այս քանդակները զինանշանային հենք ունեն և նման են մանրանկարի պատկերին: Այստեղ կենաց ծառի դերն իր վրա է վերցրել եռանկյունաձև խորշը:

Գագիկ Արծրունի թագավորը, որպես երկրորդ ստացող, 10-րդ դարի սկզբին ձեռք է բերել 862 թվականին ստեղծված և պատկերագրված «Ավետարան», որը 912 թվականին նրա կինը՝ Մլքե թագուհին, նվիրել է Վարազի Սուրբ Աստվածածին եկեղեցուն: Այն պատմագիտությանը հայտնի է որպես «Մլքե թագուհու Ավետարան»:

Այս «Ավետարանի» խորաններից մեկի վրա պատկերված է զինանշան: Խորանի կապույտ ֆոնի վրա ոսկեգույնով պատկերված են դիմահայաց առյուծներ, իսկ նրանց միջև տեղադրված է կենաց ծառ: Առյուծներից յուրաքանչյուրի առջևի մեկ թաթը դրված է կենաց ծառի վրա: Նրանց մեջքի մասում գունդ է պատկերված, որն իշխանության խորհրդանիշ է: Առյուծներից յուրաքանչյուրի տակ ոսկեգույնով լցված շրջան է նկարված, որը նույնպես իշխանության խորհրդանիշի հաստատումն է: Առյուծները պատկերված են գլուխները բարձր պահած դիրքով, իսկ պոչերն իջած են ցած, որ նշան է կենդանիների հանդարտ, հանգիստ, սեփական արժանապատվության մեջ համոզված լինելու:

Հնարավոր է, որ Արծրունիների ճյուղերից մեկը առյուծապատկերը որդեգրել է որպես խորհրդանիշ-զինանշան, ինչպես նաև 862 թվականի «Ավետարանը», ամենայն հավանականությամբ, ստեղծվել է Արծրունիների միջավայրում և մանրանկարի զինանշանային պատկերը պատկանում է նրանց: Ամենայն հավանականությամբ, այս մանրանկարն իր գունային լուծմամբ արտացոլում է Արծրունիների պետական դրոշի մանրակերտը:



## ՄՅՈՒՆԻՔԻ ԹԱԳԱՎՈՐԱԿԱՆ ՏԱՆ ՉԻՆԱՆՇԱՆՆԵՐԸ

10-րդ դարի 80-ական թվականներին թշնամական հարձակումներից ժամանակավորապես թուլացել էր Բագրատունիների իշխանությունը: Երկիրը ցնցվում էր ոչ միայն արտաքին թշնամիների հարձակումներից, այլև ներքին կենտրոնախույս ուժերի ինքնիշխանական ձգտումներից:

Ինքնօրինության էին ձգտում նաև Սյունիքի գահերեց տերերը: Եվ ահա 987 թ-ին Սյունիքի գահերեց իշխան Սմբատ Ա Սահակյանը Սյունիքը հռչակում է անկախ թագավորություն: Նորահաստատ թագավորությունն ընդգրկում էր Սյունիքի նահանգի հարավային հողերը: Թագավորության սահմաններից դուրս մնացին Սևանա լճի ավազանը և Երնջակ գավառը: Առաջինը մասն էր Բագրատունիների կենտրոնական իշխանության, իսկ Երնջակը կցված էր Գողթնի ամիրայությանը: Անկախության հռչակման հաջորդ տարվանից Սմբատ Ա Սահակյանն ընդունեց Բագրատունի Սմբատ Բ Տիեզերակալի գերագահությունը: Սմբատ Բ Տիեզերակալի հաջորդը՝ Գագիկ Ա-ն, Սյունիքի թագավորությունից անջատեց Վայոց Ձոր, Ճահուկ գավառներն ամբողջությամբ և Ծղուկք գավառի հյուսիսային մասը, որոնց փոխարեն Սյունիքի թագավորությանը տվեց Գողթնի ամիրայությունից գրավված Երնջակ գավառը: Այսպիսով, Սյունիքի թագավորությունը հիմնականում ամփոփվեց պատմական նահանգի հարավային մասում և զբաղեցնում էր մոտ 5500 քառակուսի կիլոմետր տարածք: Սյունիքի թագավորության մայրաքաղաքը Կապան քաղաքն էր, հոգևոր կենտրոնը՝ Տաթևի վանքը:

Սյունիքի թագավորների հովանավորությամբ՝ երկրամասում շինարարական մեծ գործունեություն ծավալվեց. ամրացվեցին բերդերը, կառուցվեցին հոգևոր-մշակութային օջախներ, գրվեցին ու ընդօրինակվեցին հարյուրավոր արժեքավոր ձեռագրեր: Միայն Տաթևի վանքում 11-րդ դարի կեսերին գործում էին շուրջ հազար միաբաններ, նշանավոր վարդապետներ, իմաստասերներ, երաժիշտներ, արիես-

տավորներ: Այդ տարիներին են կառուցվել Վաղաղնի Սուրբ Ստեփանոս (1000թ.), Սուրբ Կարապետ (1006թ.), Վահանավանքի Սուրբ Աստվածածին (1086թ.) եկեղեցիները և բազմաթիվ այլ կառույցներ:

Սյունիքի թագավորները, ապավինելով իրենց բարձրաբերձ լեռներին երկար ժամանակ պահպանում էին իրենց անկախությունը: Բայց սելջուկ-թուրքերի անընդմեջ հարձակումները երկրամասը զրկեցին պաշտպանական կառույցներից: Ընկան ու ավերվեցին Կապանը, Որոտնաբերդը, Բղենը, Կաքավաբերդը, Գրիհանը, Գեղին, Բաղաբերդը: Գանձակի թուրք ամիրա Ելտկուզի հրոսակները Բաղաբերդում այրեցին տասը հազար ձեռագիր մատյան: 1170 թվականին իրականացված այս բարբարոսությունը հայկական մշակույթի առաջին մեծ եղեռնն է: Այդ նույն՝ 1170 թվականին, ելտկուզյան թուրքերի հարվածների տակ թագավոր Հասան Գեռաբարեցին հեռացավ Հայրենի Խաչեն ու ընկավ Սյունիքի թագավորությունը, որ 125 տարով ավելի պահպանեց իր անկախությունը, քան Բագրատունիների կենտրոնական թագավորությունը:

Սյունիքի թագավորների զինանշանների մասին գրավոր տեղեկություններ հայտնի չեն: Սակայն զինանշանային երկու պատկեր



պահպանվել է Վայոց Ձոր գավառի Եղեգիս ավանի հյուսիս-արևելյան կողմում կառուցված Ցաղաց քար համալիրի Սուրբ Կարապետ եկեղեցու պատերին:

Շքամուտքի վերնամասում տեղադրված է եղել մի հոյակապ արծվաքանդակ: Արծիվը պատկերված է բացված քևերով, պոչի վրա հենված: Ուռուցիկ կուրծքը ձևավորված է թեփուկաքանդակներով, քևերը՝ զուգահեռ գծերով, որոնց միջնամասերը փոսիկներով բաժանված են մանրիկ մասերի: Թռչունի հզոր պոչը հովհարաձև բացված է և պատկերված է զուգահեռ փոսիկներով: Արծիվը մագիլները խրել է գառան ողնաշարի մեջ: Քանդակագործը իրատեսորեն է պատկերել ոտքերը ցավից կծկած գառան մարմինը: Բազալտ քարը հոյակապ պահպանել է արձանագործական այս պատկերի բոլոր մանրամասները: Ցավոք, զինանշանակիր քարը տեղից ընկել է, և արծիվը կորցրել է գլուխը, մասամբ կտրվել է նաև գառան գլուխը: Չնայած այս կորուստներին՝ զինանշանային այս պատկերը հայ արձանագործության լավագույն աշխատանքներից մեկն է:



Նույն եկեղեցու հյուսիսային ճակատամասում ագուցված է զինանշանային ևս մեկ տարբերակ. հզոր առյուծը՝ հենված հետևի ոտքերի վրա, առջևի թաթերը սեղմել է ցուլի մեջքին ու մաշկազերծում է վերջինիս: Իր վախճանի հետ համակերպված՝ ցուլը տառապազին ծալել

է առջևի ոտքը՝ ի նշան պարտության, և խղճուկ հայացքը հառել է դիտողին: Առյուծը նույնպես հայացքը հառել է դիտողին. աչքերի կատաղի արտահայտությունը, քացված երախը՝ սեղմված ատամներով, ցույց են տալիս առյուծի հաստատակամությունը, ուժը, թշնամուն առյուծաբար հաղթելու վճռականությունը: Արձանային այս քանդակը, որի օրինակով շուրջ երկու դար անց Գեղարդի եկեղեցու ճակատին Ջաքարյանները ձևավորեցին իրենց զինանշանը, հայկական բոլոր զինանշանների քանդակներից ամենամեծն է, ինչպես նաև ամենախրատեսականներից մեկը:

Չինանշանային երկու տարբերակներում էլ ցուցադրված է Սյունյաց տերերի առասպելական քաջությունը, արիական գերազանցությունը թշնամիների և հակառակորդների նկատմամբ: Այդ են հաստատում ինչպես արժիվը, այնպես էլ առյուծը, որոնք հաղթում են թշնամական ուժերին:



## ԿԻԼԻԿԻԱՅԻ ՀԱՅՈՑ ԹԱԳԱՎՈՐՈՒԹՅԱՆ ՁԻՆԱՆՇԱՆԸ

**Մ**այր Հայաստանում կորցնելով պետականությունը՝ հայերի հոծ զանգվածները տեղաշարժվեցին Փոքր Ասիայի արևմտյան մասերը և հիմնականում հաստատվեցին դեռևս Տիգրան Մեծի ժամանակներից հայերով բնակեցված Դաշտային Կիլիկիայում ու Լեռնային Կիլիկիայում: Ու երբ այս նոր տարածքում հայկական էթնոսը հասավ գերիշխանության, անհրաժեշտություն դարձավ հայկական պետականության ստեղծումը:

Կիլիկիայի հայկական պետությունը ստեղծվեց 11-րդ դարի վերջին քառորդում՝ բյուզանդական և սելջուկյան նվաճողների դեմ հայերի ազատագրական պայքարի շնորհիվ: Ապրել է զարգացման երկու ժամանակաշրջան՝ մեծ իշխանության (1080-1198թթ.) և թագավորության (1198-1375 թթ.):

Կիլիկյան Հայաստանը գտնվում էր Փոքր Ասիայի հարավ-արևմուտքում, Միջերկրական ծովի հյուսիս-արևելյան կողմում: Տարածքը մոտ 40 հազար քառակուսի կիլոմետր էր: Հարավից Կիլիկյան Հայաստանը շուրջ 500 կմ երկարությամբ ողողում էին Միջերկրականի ջրերը:

Մեծ իշխանության հիմնադիրը Բագրատունիների և Արծրունիների ազգական Ռուբեն Առաջինն էր, իսկ թագավորությանը՝ Լևոն Բ Մեծագործը:

Լևոն Ա Մեծագործի թագադրման արարողությունը տեղի ունեցավ 1198 թվականի հունվարի 6-ին՝ Քրիստոսի Սուրբ Ծննդյան օրը, Տաքսոն քաղաքի Սուրբ Մոֆիաշի մայր տաճարում: Թագադրության հանդեսին ներկա էին Բյուզանդիայի, Գերմանիայի Սրբազան կայսրության, Բաղդադի խալիֆայի, հարևան այլ երկրների, Մեծ ու Փոքր հայոց պատվիրակությունները, Տաքսոնի հունաց պատրիարքը, Ասորիքի ու Հայոց կաթողիկոսները, բարձրաստիճան հոգևոր այլ գործիչներ, հայոց զորաբանակը, բազմահազար ժողովուրդ: Լևոն Ա-ն օծվեց «Թագավոր ամենայն Հայոց, և նահանգին Կիլիկեացոց, և Իսավղից»:

Կիլիկյան Հայաստանի պետականությունը շուրջ 300 տարի Փոքրասիական այս տարածաշրջանում հայամտածողության, հայապահպանության, հայ մշակույթի վերակերտման օազիս դարձավ:

Կիլիկիայի հայկական իշխանապետության իշխանները, անշուշտ, ունեին իրենց զինանշանները, սակայն զինանշանների առավել հավաստի օրինակներ պահպանվել են Կիլիկիայի թագավորական շրջանից՝ հիմնականում այս շրջանում հատված հայկական հայատառ դրամների վրա:

Կիլիկիայի հայոց թագավորության հիմնադիր Լևոն Ա Մուշեղը (1198-1219թթ.) իր իշխանության օրոք հատված արծաթյա հայկական երկդրամյանի վրա ընտրել է թագակիր առյուծի պատկերը: Առյուծը գլխով դեպի ձախ է դարձած և նայում է դիտողին: Առյուծի մարմնի կենտրոնական մասում, աջից ձախ՝ վերից վար իջնող խաչ է պատկերված: Խաչի պատկերը գծված է վերևում կարճ, ներքևում՝ երկար հորիզոնական երկու գծերով:

Վատիկանի թանգարանում են գտնվում Կիլիկիայի Լևոն Ա թագավորի կնիքները:

Ղրանցից մեկի վրա պատկերված է գահին բազմած Լևոն Ա թագավորը: Պատմության վրա կրում է արքայական քիկնոց, որի վրայի կլոր մեղալիոնների մեջ առյուծներ են պատկերված: Որպես արքայական խորհրդանիշ՝ Լևոն Ա-ն աջ ձեռքում բռնել է խաչանիշ գունդը, իսկ ձախում՝ շուշանագլուխ մականը:

Մյուս կնիքի մեղալիոնի մեջ պատկերված է գլխով դեպի աջ դարձած թագակիր առյուծ: Առյուծը հայացքն ուղղել է դիտողին և թվում է, թե ավելի շատ տղամարդու դեմք ունի: Առյուծի պոչը S տառի տեսքով տնկված է վեր և ավարտվում է սրածայր զարդանշանով: Առյուծը առջևի աջ թաթով մարմնի վրա պահում է խաչակիր գավազան, որն իշխանության նշան է:



Փաստորեն, այս առյուծապատկերը Լևոն Ա քազավորի զինանշանն է:

Լևոն Առաջինը, որպես պետության խորհրդանիշ, օգտագործել է նաև երկառյուծ պատկերագրությամբ զինանշան: Շրջանակի ներսում, հետևի և առջևի թաթերով շրջանագծին հենված՝ պատկերված են երկու առյուծներ, որոնք գլխով շրջված՝ նայում են իրար: Երկու առյուծներին բաժանում և նրանց պոչի մասից սկսվում ու մինչև շրջանակի եզրը ձգվում է խաչը, որը դարձյալ հորիզոնական երկու գծով է ձևավորված: Այս պատկերը նման է Արտաշեսյանների երկարժիվ զինանշանին: Այստեղ ութաթև աստղին փոխարինում է խաչը:

Լևոն Առաջինի երկդրամյանի պատկերագրությամբ՝ գլխով ձախ դարձած առյուծի պատկերով, զինանշան է օգտագործել նաև Լևոն Երկրորդը (1270-1289թթ.): Սակայն այս դեպքում առյուծը թազակիր չէ:

Հայ արքաներից ուրիշ որևէ մեկը Կլիկիայի հայոց Լևոն Բ քազավորի այն երջանկությունը չի ունեցել, որ իր ժամանակակից մանրանկարչի կողմից մի քանի անգամ պատկերվի: Մեզ են հասել Լևոն Բ-ի երեք դիմապատկերները, որոնցից երկուսի հեղինակը մանրանկարիչ Թորոս Ռոսլինն է:

Ռոսլինյան այս երկու մանրանկարների վրա էլ Լևոն Բ քազավորի հագուստի վրա պատկերված են զինանշաններ:

Երևանի Մեսրոպ Մաշտոցի անվան հին ձեռագրերի ինստիտուտ Մատենադարանում պահվող թիվ 8321 ձեռագիր «Ավետարանի» 25ա էջում ողջ հասակով պատկերված է Լևոն Բ-ն, երբ դեռևս թազաժառանգ էր:

Լևոն Բ-ն հազած է կապույտ գույնի պատմունճան, որի վրա կրում է կարմիր գույնի թիկնոց:

Կապույտ պատմուճանի վրա դեղին ոսկեթելով գործված են կլոր մեղալիոններ: Մեղալիոնների ներսում գործված է գլխով դեպի ձախ շրջված և վարգի դիրքով առյուծ: Կենդանու մեջքի միջին մասում գործված է կլոր գունդ՝ իշխանության խորհրդանիշը:

1262 թվականին, Լևոն Բ քազավորի և Կեռան քազուհու ամուսնության առթիվ Թորոս Ռոսլինն ընդօրինակել է մի նոր «Ավետարան», որի 288ա էջում պատկերված են քազավորն ու քազուհին՝ պաշտոնական հանդերձանքով:



Լևոն Բ քազավորը հագած է կապույտ գույնի պատմուճան և կրում է բաց ծիրանագույն թիկնոց: Պատմուճանի վրա կարմիր գույնով պատկերված են մեղալիոններ, որոնց ներսում նույն գույնով, գլխով դեպի ձախ դարձած առյուծ է պատկերված: Այն ամբողջովին կրկնում է Լևոն Բ-ի նախորդ նկարի առյուծապատկերը: Թիկնոցի վրա սպիտակ գույնով մեղալիոններ են պատկերված, որոնց ներսում գլխով դեպի աջ ու ձախ դարձած մարդու դեմքով արծիվներ են պատկերված: Մեղալիոնների

առաջացրած կորագիծ քառակուսու ներսում պատկերված են պոչի վրա հենված, թևերը մարմնից հորիզոնական դիրքով հեռացրած դիմահայաց արծիվներ: Թռչունը կտուցով շրջված է դեպի աջ:

Կեռան թագուհին հանդերձավորված է կապույտ պատմունճանով և կարմիր գույնի թիկնոցով:

Պատմունճանը դրվագազարդված է ոսկեգույն և կարմիր գույնի թելերով: Ուրրուն նախազարդի ներսում պատկերված է պոչի վրա հենված, թևերը մարմնից ուղղահայաց հեռացրած, դիմահայաց, թագակիր, մարդու դեմքով արծիվ:

Լևոն Բ թագավորի հագուստի վրա պատկերված առյուծը, մարդու դեմքով արծիվները կրկնում են շուրջ 200 տարի առաջ Կարսի Գագիկ Աբասյան թագավորի, Գորանդուխտ թագուհու և Մարեմ արքայադստեր հագուստի վրա եղած պատկերները և ներկայացնում Հայոց արքայատների ժառանգորդության փաստը:

Այստեղ շատ կարևոր է նաև գույների խնդիրը. օգտագործված են կարմիր, կապույտ, ծիրանագույն, սպիտակ գույները, որոնք, համոզված ենք, Կիլիկիայի պետական դրոշի շերտագույներն են:


Հեթում Առաջին թագավորն իր հատած դրամների վրա փոխել է առյուծի դիրքը. այն գլխով շրջված է դեպի աջ և նայում է իր պոչին: Փոխվել է նաև խաչի դիրքը. այն նույնպես սկսվում է ձախից և թեքությամբ իջնում է դեպի աջ:

Կիլիկիայի հաջորդ թագավորները՝ Օշինը (1308-1320թթ.), Լևոն Չորրորդը (1320-1342թթ.), Կոստանդին Երրորդը (1344-1363թթ.), Կոստանդին Չորրորդը (1365-1373թթ.) օգտագործել են միատեսակ զինանշան: Նրանց դրամների վրա առյուծը, ինչպես և Հեթում Առաջինի օրոք, գլխով շրջված է դեպի աջ: Տարբերությունը միայն այն է, որ առյուծը դեմքով ոչ թե պոչի ուղղությամբ է նայում, այլ դեպի առաջ: Առյուծը պատկերված է բաց երախով: Բոլոր այս պատկերներում առյուծի թիկունքում եղած խաչը նույն տեղադրությունն ունի, ինչ որ Հեթում Առաջինի դրամների վրա: Այս բոլոր դրամների վրա խաչի պատկերը մեկ հորիզոնական գծով է պատկերված:

Փաստորեն, Կիլիկիայի հայոց թագավորության զինանշանի վրա, բացի Լևոն Առաջինի երկառյուծ երկրորդ զինանշանից, մյուս բոլոր թագավորները (նաև՝ Լևոն Առաջինը) պատկերել են գլխով աջ կամ ձախ թեքված միայնակ առյուծ՝ որոշ պատկերագրական տարբերություններով:

Կիլիկյան պետության Լևոն Առաջին թագավորի՝ գլխով դեպի

ձախ շրջված և դեմքով դիտողին նայող առյուծի պատկերով զինանշանն օգտագործվել է թե՛ Հայաստանի Առաջին Հանրապետության, թե՛ Հայաստանի Երկրորդ Հանրապետության զինանշանների վրա:



Հատված Լևոն Ե թագավորի տապանաքարից

Չույգ առյուծներ են քանդակված մաև 1399 թվականին մահացած և Փարիզի Սեն Դնի տաճարում թաղված Լևոն Ե թագավորի տապանաքարի վրա:



## ՉԱՔԱՐՅԱՆՆԵՐԻ ՁԻՆԱՆՇԱՆՆԵՐԸ

**Չ**աքարյանները հայոց պատմության թատերաբեմ բարձրացան 12-րդ դարի երկրորդ կեսին, և հայ ժողովրդի համար, որ արդեն մեկուկես դար կորցրել էր քաղաքական անկախությունը, միասնությունը, հավաքականությունը, սեփական ուժերին ապավինելու և հարագատ երկրի ու հայ ժողովրդի անկախությունը բարենորոգելու առաքելական դերը կատարեցին:

Իշխանատան հիմնադիրը Չաքարեի որդի Սարգիսն էր: Այս Սարգիսը, որ հիշվում է Սարգիս Մեծ անունով, թերևս մեծ էր նախևառաջ որպես քաղաքական գործիչ, դիվանագետ: Իր ժամանակի քաջ ու արժանավոր հայազգի իշխաններից այս Սարգիսն էր, որ հասկացավ հայ-վրացական զինակցության ուժն ու անհրաժեշտությունը և իր որդիների ու եղբոր քաղաքական կողմնորոշումը դարձրեց անկախ վրաստանի հզորացումը, այդ երկրում հայերի արտոնյալ վիճակի ապահովումը, հայազգի իշխանների զինական ուժերի համախմբումն ու հայկական առանձին բանակի ստեղծումը վրացական զորքի կազմում, որի հրամանատարն էլ դարձավ ինքը: Նա առաջինն էր, որ դարձավ նաև Հայ-վրացական բանակի ամիրսպասալարը (զլխավոր հրամանատար): Նրա որդիները՝ Չաքարե Բ-ն և Իվանե Ա-ն, շարունակեցին հոր սկսած գործը և ի կատար ածեցին հայ ժողովրդի երազանքը. շուրջ երկու տասնամյակում թուրք-սելջուկներից ամբողջովին մաքրեցին Բագրատունյաց Անի-Շիրակյի, Կարսի, Չորագետի քաղաքությունների, Սյունյաց իշխանության հողերը և այդ տարածքում ստեղծեցին իրենց իշխանապետությունը:

Չաքարյանների նախնիները փոքրիկ կալվածքներ ունեին

Հյուսիսային Հայաստանում՝ Տաշիր-Չորագետում: Հաղարծինի եկեղեցու արձանագրության մեջ Իվանե Ա-ն հայտնում է, որ իրենք սերում են Բագրատունիներից: Հայտնի է, որ նրանց մայրը Թիֆլիսի ամիրա, Մահկանաբերդի իշխանաց իշխան Զուրդ Արծրունու քույր Սահակդուխտն է: Այս էլ հաստատված է ժամանակի հիշատակություններով, արձանագրություններով, ինչպես նաև Չաքարե Բ-ի և Իվանե Ա-ի՝ Անբերդի արաբատառ արձանագրության մեջ:

Հոր կողմից Բագրատունի, մոր կողմից Արծրունի Չաքարե Բ-ն և Իվանե Ա-ն, ինչպես նաև նրանց հորեղբորորդի Չաքարե Գ-ն, իշխանապետության հողերը բաժանեցին երեք մասի: Անի-Շիրակի թագավորության հողերը, Լոռու մի մասը, Արագածոտնը բաժին ընկան Չաքարե Բ-ի տանը, որին ենթակա էին Վաչուտյանները, Պահլավունիները, Հոնենք, Արծրունիները, Մամիկոնյանները: Նրանց մայրաքաղաքն էր Անին: Լոռու մի մասը, Այրարատյան նահանգի մի քանի գավառներ, Գեղամա լճի ավազանը բաժին ընկան Իվանե Ա-ի տանը, որին ենթակա էին Դոփյանները, Պռոշյանները, Օրբելյանները: Նրանց մայրաքաղաքն էր Դփինը: Քուռ գետի աջափնյա տարածքը՝ Լոռուց մինչև Գանձակ, և Գեղամա լեռները դարձան Վահրամյանների սեփականությունը: Նրանց ենթակա էին Նորբերդի և Մածնաբերդի Կյուրիկյանները (Բագրատունիները): Իշխանատիրության մայրաքաղաքը Գագ ամրոցն էր:

Անսահմանափակ էր Չաքարյանների իշխանությունը: Եվ, իրավամբ, ժամանակակիցները նրանց անվանել են ինքնիշխան տերեր, թագավորներ:

Հայոց պատմության մեջ մշակույթի, տնտեսության, շինարարական արվեստի ոսկե դար կարելի է կոչել Չաքարյանների իշխանապետության այն շրջանը, որ նախորդեց 1236 թվականի մոնղոլական արշավանքներին: Կառուցվեցին հարյուրավոր հույակերտ եկեղեցիներ, անառիկ բերդեր, պալատներ, գրվեցին ու նկարագարովեցին հազարավոր բարձրարժեք ձեռագրեր, բացվեցին դպրոցներ ու բարձր տիպի դպրանոցներ, համալսարաններ:

Չաքարյան տան ներկայացուցիչները մոնղոլական գերիշխանության հաստատումից հետո էլ գերագահ դեր ունեին հայ-վրաց իշխանների վրա, զբաղեցնում էին պետության բարձր պաշտոններ (աթաբեկ-թագավորահայր, ամիրսպասալար-գլխավոր հրամանատար, մսախորթուխուցես-արքունի մեծ վեզիր):

Հետաքրքիր զարգացում է ապրել Չաքարյանների զինանշա-

նային պատկերագրությունը: Այս տոհմի Վահրամյան ճյուղի զինանշանը թևաբաց, ճանկերով աղվես բռնած արծիվն էր, ինչպես նաև՝ զույգ առյուծները: Իսկ ասիա Չաքարյանների մյուս տները՝ Չաքարե Բ-ի և Իվան Ա-ի տոհմերը, զինանշանների պատկերագրությամբ հաստատելով Բագրատունիների իրավահաջորդ լինելը, իրենց կառույցների վրա որպես զինանշան փորագրել են նաև առյուծներ:

Արծվի պատկերով զինանշանի վաղագույն օրինակը քանդակված է Սանահինի՝ Չաքարե Բ-ի և Իվան Ա-ի կողմից 1198 թվականին կառուցված տոհմական դամբարանի մուտքի բարավորին: Արծիվները քանդակված են խաչի երկու




կողմերի հավերժության վարդյակների վրա կանգնած, կողքից, գլխով իրար դարձած: Թռչունների մարմնի մանրամասները ժամանակի ընթացքում որոշ չափով մաշվել են և երբեմն շփոթում են աղավնիների հետ:

1215 թվականին Իվան Ա-ի միջոցներով և հովանավորությամբ կառուցված Գեղարդի գլխավոր եկեղեցու հարավային մուտքի բարավորի երկու կողմերում փորագրված են դեմ-դիմաց կանգնած արծիվներ (ինչպես Չաքարյանների տոհմական դամբարանում): Այստեղ արծիվները ոչ թե իրար, այլ դիտողին են նայում:

Չույզ արծիվների քանդակի մեկ այլ տարբերակ առկա է 13-րդ դարի 40-ական թվականներին Սանահինում կառուցված զանգակատան մուտքի բարավորին: Մուտքի սլաքածև բարավորի երկու կողմերում, դեմ-դիմաց փորագրված են իրար նայող արծիվներ: Վերջիններս՝ հզոր ոտքերով, ուղղահայաց դիրքով կանգնած են պատվանդանների վրա: Թռչունների գլուխները կտրված են: Նրանց կուրծքը և թևագլուխը մշակված են թեփուկաքանդակով: Թևերը, պոչը, ոտքերի վերնամասը մշակված են զուգահեռ փոսիկազծերով:

Արծվի կողապատկերով զինանշանների դիտարկված օրինակներին հակառակ՝ Չաքարյան տոհմի ներկայացուցիչները կյիտառել են նաև արծվի այլ պատկերաձևեր:



Դրանցից մեկը գտնվում է Գեղարդի մեծ եկեղեցու թմբուկի արևելյան կամարադեղի վերնամասում: Պատկերված է մագիլներով կենդանու ողնաշարից բռնած արծիվ: Թռչունը պատկերված է դիմահայաց, հենված է հզոր պոչի վրա: Կուրծքը վերնամասում վահանաձև է, լիքը, թևերը բացված դիրքով են՝ հողամասում հատուկ ձևավորմամբ, թևերը և պոչը իրականացված են խոր ակոսներով: Գլուխը



կլորավուն է, հզոր կտուցով և տիրական հայացքով: Կրծքի գրեթե կենտրոնից իջնող ոտքերի ճանկերով ամուր բռնել է գլխով դեպի աջ դարձած կանվազգիների ընտանիքին պատկանող կենդանու (հավանաբար՝ հովազի կամ վագրի), որը ցավից կծկել է ոտքերը:

Ազատագրված Անին դարձավ ոչ միայն Չաքարե Բ-ի տան, այլև ամբողջ իշխանապետության մայրաքաղաքը: Հավանաբար, հենց Չաքարե Բ-ի օրոք, 13-րդ դարի սկզբներին, քաղաքի պարսպի մեջ ագուցվել է նոր իշխանատոհմի՝ Չաքարյանների զինանշանը: Մեզ հասած լուսապատկերից կարելի է եզրակացնել, որ արծիվը հիմնականում կրկնել է Գեղարդի թմբուկի պատկերաքանդակը: Արծիվը թևաքաց է, լիքը կրծքով, ցավոք, գլուխը կտորված է: Հզոր ոտքերով կանգնած է ինչ-որ կենդանու վրա, որի ինչ լինելը դժվար է պարզել: Գերված, բռնադատված Անիի այս նշխարն էլ, հավանաբար, զոհ է գնացել թուրքերին:

Անիի Փրկիչ եկեղեցին կառուցվել է 1036 թվականին, Աբլղարիք Պահլավունու պատվերով: 1342 թվականին Չաքարյան Վահրամ Դ. աթաբեկի կողմից եկեղեցու գմբեթը նորոգվել է և, ամենայն հավանականությամբ, այդ ժամանակ էլ գմբեթի թմբուկի նիստերից մեկին, վերնամասում ագուցվել է Չաքարյանների զինանշանը՝ դիմահայաց արծիվը: Չինանշանը պատկերագրությամբ նման է Գեղարդի զխավոր եկեղեցու թմբուկի քանդակին: 1957 թվականին մարդկային ստեղծագործության ռիսերիմ թշնամի ու Անին բռնատիրող թուրքերի օգնությամբ եկեղեցու արևելյան կեսը պոկվել, խոնարհվել է: Կիսված եկեղեցին, ինչպես և մեր կիսված ազգը, ի հեճուկս թուրքերի, անգամ այդ վիճակում կանգուն է և կրում է Չաքարյանների արծվանշանը:

Չաքարյանների առյուծապատկերով վաղագույն զինանշանը փորագրվել է Մակարավանքի փոքր եկեղեցու արտաքին պատին: Եկեղեցին 1198 թվականին կառուցել է վանքի վանահայր Հովհաննես Ա-ն:

Մակարավանքի առյուծներով զինանշանը փորագրված է պատուհանի պսակի վերնամասում: Դեմ-դիմաց պատկերված են երկու առյուծներ: Նրանք հետևի ոտքերով





հենված են պսակի հորիզոնական հատվածներին, առջևի մեկական ոտքերը հենել են պսակի աղեղնաձև պարակալին, իսկ մյուս գույգ ոտքերով՝ «ձեռք սեղմել»։ Առյուծները դեմքով դարձած են դիտողին։ Աջակողմյան առյուծի

պոչը գտնվում է ոտքերի արանքում, ձախակողմյանինը՝ սովորական դիրքով կախ է ընկած գետնին։

Կենդանիների դեմքերը, իշխանատենչ աչքերը լավ մշակված են։ Այստեղ անվերապահորեն պատկերված են Ջարարյան երկու եղբայրները՝ Ջարարե Ա-ն և Իվանե Ա-ն։ Այդ քվականներին նրանք ձեռք-ձեռքի սկսեցին հայկական հողերի ազատագրության գործը։

Մեկ տասնամյակ անց, Իվանե Ա-ի իշխանության տարածքում օգտագործման դրվեց առյուծի և ցուլի պատկերագրությամբ նոր զինանշան։ Մեզ հայտնի են երկու օրինակ. մեկը՝ Մակարավանքի գավթից, մյուսը՝ Գեղարդի գլխավոր եկեղեցուց։ Երկու քանդակներն էլ իրենց ժամանակաշրջանով համընկնում են. Գեղարդի եկեղեցու կառուցումն ավարտվել է 1215 թվականին, Մակարավանքի գավիթը կառուցվել է 1210-1220-ական թվականներին։

Գեղարդում զինանշանը տեղակայված է գլխավոր եկեղեցու հարավային ճակատի պատուհանի վերնամասում։ Առյուծը առջևի ոտքերով հենված է գլխով դեպի իրեն դարձած ցուլի մեջքին։ Երկու կենդանիներն էլ դեմքով նայում են դիտողին։ Թեև կենդանիների մարմնի մանրամասներն ընդգծված չեն, բայց բարձրաքանդակներն իրականացված են ճշմարտացի և բավականին ազդեցիկ տեսք ունեն։

Մակարավանքի գավթի արևմտյան մուտքի ձախակողմում առկա է նույն զինանշանի մեկ այլ տարբերակ։ Առյուծը գետին է տապալել ցուլին և ճանկերը խրել վերջինիս մաշկի մեջ։ Քանդակագործի ձեռագիրն այստեղ մի քիչ ավելի նուրբ է, թեև շատ հավանական է, որ երկու զինանշաններն էլ իրականացրել է նույն քանդակագործը։ Այս



Գեղարդ



վերջին զինանշանը թեմատիկ առումով կրկնում է Սյունյաց տերերի՝ Յաղաց քարի Սուրբ Կարապետ եկեղեցու պատին ագուցված զինանշանին:

Այս երկու զինանշաններում մեկ առյուծի հանդես գալն ակներևորեն հաստա-



Մակարավանք

տում է, որ իշխանության այդ հատվածը պատկանում է Իվանե Ա-ի տանը:

Անվերապահորեն զինանշանային բնույթ ունի նաև Հաղարծինի գլխավոր եկեղեցու հարավային ճակատի առյուծի բարձրաքանդակը: Կենդանին պատկերված է կողքից, դեմքով շրջված է դեպի դիտողը, պոչը ոտքերի արանքում է: Թեև գլուխը հողմնահարված է, բայց տիրական արտահայտություն ունի: Ընդհանուր առմամբ՝ հիշեցնում է Մակարավանքի գույզ առյուծներից ձախակողմյանին: Գլխավոր եկեղեցին, ըստ մուտքի բարավորի արձանագրության, կառուցվել է 1281 թվականին: Չինանշանը պատկանում է Իվանե Ա-ի հաջորդներին:

## ՎԱՀՐԱՄՅԱՆՆԵՐԻ ՉԻՆԱՆՇԱՆԸ



**Վ**ահիրամյանները Չաքարյան ավատական տան ներկայացուցիչներից են, Չաքարե Ա-ի Վահիրամ որդու հաջորդները:

Չաքարե Բ-ի և Իվանե Ա-ի ազատագրական պատերազմներին ակտիվորեն մասնակցում էին հորեղբորորդիներ Չաքարե Գ-ն և Սարգիս Գ-ն: Թամար քագուհին շռայլորեն վարձատրեց Չաքարյաններին: Սարգիս Բ-ի ժառանգներից անկախ՝ Չաքարե Գ-ն Վաճառի իր փոքրիկ կալվածքներին ավելացրեց Գագի բերդը (ներկայումս՝ Նոյեմբերյանի տարածաշրջանում) և շրջակայքը, իսկ նրա եղբայր Սարգիս Գ-ն ստացավ Չավախքը՝ Թմուկ բերդով, և 14-րդ դարում ընդունելով քաղկեդոնականություն՝ վրացիացավ ու մեծ դեր խաղաց վրացական մշակույթի զարգացման գործում:

Մինչև 1210-ական թվականները Չաքարե Գ Վահիրամյանն իր արյունակիցների օգնությամբ վերագրավեց Զուռի աջափնյա հայկական պատմական հողերը՝ մինչև Սևանի լեռներն ու մինչև Գանձակ, և ստեղծեց մի մեծ, ուժեղ իշխանատիրույթ, որը իր տարածքով երրորդն էր Չաքարյանների իշխանապետությունում:

Վահիրամյաններն իրենց իշխանատիրույթի սահմաններն ընդարձակելու, երկրամասը խաղաղ պահելու համար կռիվներ են մղել հարևան ելտկուզյանների, Ջալալ էդ-Դինի դեմ, վերագրավել են վերջինիս նվաճած Շամբորը:

Վահիրամյանների իշխանատիրույթի մայրաքաղաքը Գագ ամրոցն էր, իսկ հոգևոր կենտրոնը՝ Նոր Վարագավանքը (ներկայումս՝ Տավուշի տարածաշրջանում):

Այս հզորագույն իշխանատան ներկայացուցիչները իրենց լայնածավալ իշխանատիրություն և հովանավորում էին մշակույթի զարգացումը: Պատերազմական կարճատև դադարների տարիներին երկրամասում ծավալվում էր աննախադեպ շինարարական եռուզեռ, գրվում ու ընդօրինակվում էին արժեքավոր ձեռագրեր:

Չաքարյանները տարբեր առիթներով շեշտել են, որ իրենք Բագրատունիների սերնդից են և որպես իրավահաջորդ՝ ժառանգեցին Բագրատունիների զինանշանը: Մեզ է հասել Վահրամյանների զինանշանի ընդամենը մեկ օրինակ: Այն գտնվում է Խորանաշատի (ներկայումս՝ Տավուշի տարածաշրջանում) Սուրբ Աստվածածին եկեղեցու արևելյան պատին:

Սուրբ Աստվածածին եկեղեցու կառուցումն սկսվել է 1206-1210-ական թվականներին և ավարտվել մինչև 1221 թվականը: Եկեղեցին հիմնադրել ու կառուցումը հովանավորել է միջնադարի մեծ ուսուցչապետերից մեկը՝ Վանական Վարդապետը: Հավանաբար, նրա պահանջով եկեղեցու արևելյան ճակատին, ամենաաչքի ընկնող տեղում, գույգ պատուհաններից վերև, վեհասրբանչ խաչի աղեղնաձև հիմքի տակ տեղադրվել է իշխանատիրության տերերի զինանշանը՝ ճանկերով ինչ-որ կենդանու ողնաշարից բռնած արծիվը: Արծիվը քանդակված է թևերը բաց, թռիչքի պահին, հարթ, առանց մանրամասների ընդզման և գրեթե կրկնում է Անիի Մայր տաճարի արևմտյան ճակատի Բագրատունիների զինանշանի գույգ արծիվների: Արծվի ճանկերի մեջ՝ գլխով դեպի ձախ դարձած կենդանին, գլխատիչ գազան է, հավանաբար, աղվես: Նման եզրակացության հիմք է տալիս կենդանու սուր, բաց երախը, երկար ականջները: Հակառակ արծվի՝ այս կենդանու մարմնի մանրամասներն ավելի որոշակի ընդգծված են ու խոսուն:

Վահրամյանները, որպես տոհմական զինանշան ընդունելով ազատ, անընկճելի արծիվին, միաժամանակ իրենց թշնամիներին, որ սելջուկ-թուրքերն էին, պատկերել են թալանի, արյան, խորամանկության մարմանցում կենդանու՝ աղվեսի տեսքով, որին իրենք ողնաշարախեղ են դարձրել, ինչպես



վարվեցին թուրք ելտկուզյանների հետ, երբ ազատագրում էին իրենց լայնածավալ իշխանատիրույթը:

Խորանաշատում առկա է ևս մեկ զինանշանային պատկեր՝ 1216-1250-ական թվականների ընթացքում կառուցված գավթի արևմտյան պատին, մուտքից վերև: Այստեղ տեսնում ենք երկու նստած առյուծներ, որոնց կենտրոնում պատկերված մարդը բռնել է առյուծների պարանոցներին ագուցված շղթան: Կենդանիները արձանային աշխատանքներ են, իսկ մարդը՝ հարթաքանդակ: Ինչպես մարդը, այնպես էլ առյուծները դեմքով նայում են դիտողին: Առյուծներ՝ այն էլ շղթայակապ, առկա են Գեդարդում, իրար դեմ առ դեմ կանգնած առյուծների պատկերները կան Մակարավանքում, Գանձասարում: Առյուծների միջև կանգնած մարդը շքեղ հագուստով է, իշխանավորի տեսքով: Այստեղ կոնկրետ կերպարներ են քանդակված, և քանդակն անժխտելիորեն զինանշանային արժեք ունի: Առյուծները կարող են լինել հայր ու որդի Ջաքարե Գ-ն և Աղբուղա Բ-ն, իսկ պարեգոտով մարդը՝ իշխանատոհմի հիմնադիր Վահրամը:





ՀՀ պատմության բանգարան



Հովհաննավանք

## ՎԱՉՈՒՏՅԱՆՆԵՐԻ ԶԻՆԱՆՇԱՆՆԵՐԸ

13-րդ դարի սկզբներին Ջաքարե և Իվանե Ջաքարյան եղբայրների ազատագրական արշավանքների ընթացքում առաջ քաշած իշխանական տոհմերից էր Վաչուտյանների նորաստեղծ իշխանական ընտանիքը, որի անդամներին վիճակված էր շուրջ մեկուկես հարյուրամյակ իշխել պատմական Նիգ-Արագածոտնի (ներկայումս՝ Ապարանի և Աշտարակի տարածաշրջաններ) հողերին:

Վաչե Ա-ն և Մամախաթունը, ինչպես նաև նրանց հաջորդները՝ Քուրդ Ա-ն և Խորիշահը, Վաչե Բ-ն, Հասանը, Դավիթը, Քուրդ Բ-ն և Խուանդ Խաթունը, Թեոդոսը Նիգ-Արագածոտնի իրենց իշխանատիրություն իշխեցին մինչև 1350-ական թվականները: Նրանց կողմից կառուցվեցին Անբերդի նոր դրյակը, բերդաքաղաքի նոր բուրգավոր պարիսպները, Կարբիի բերդը, Վարդենիսի (Ապարան) դրյակը և բերդը, Աստվածընկալի բերդը, Հովհաննավանքի, Սաղմոսավանքի, Տեղերի, Ուշիի, Աստվածընկալի, Եղիպատրուշի վանական համալիրները, Կարբիի հաղթականար զանգակատունը, Արայիի, Ճանճիկի իջևանատները, Աշտարակի կամուրջը (այժմ այդ կամրջի ձախակողմյան խելը պահպանվում է 1664 թվականին կառուցված կամրջից մի քանի քայլ հեռվում): Վաչե Ա-ն կառուցել է Մանահինի մեծ գավիթը, Մակարավանքի գավիթը: Նա և Մամախաթունը նպաստավորել են նաև Հոռոմոսի գրատան կառուցումը: Վաչե Ա-ն նորոգել է Կեչառիսի Սուրբ Նշան եկեղեցին: Ամուսիններով բազմաթիվ նվերվեր են ընծայել Հաղպատի և Մանահինի վանական համալիրներին: Քուրդ Ա-ն պատրաստել է տվել Սևանի եկեղեցու փայտե դուռը:

Վաչուտյան իշխանատոհմի զինանշանների հնագույն օրինակները պահպանվել են Հովհաննավանքում: Դրանցից մեկն ագուցված է եղել 5-րդ դարի բազիլիկ եկեղեցու արևելյան պատի արտաքին ձախ կողմում, մեկն էլ ընկած է եղել Կաթողիկե եկեղեցու ավերակների մեջ և տեղափոխվելով Հայաստանի պատմության քանգարան՝ ցուցադրվում է քանգարանի առաջին հարկում՝ միջնադարյան քարաքվեստի բաժնում:

5-րդ դարի բազիլիկ եկեղեցու պատին ագուցված զինանշանին Վաչուտյանները որպես խորհրդանիշ ընտրել են արծիվների ընտանիքին պատկանող երկու միացեղ թռչուն: Հին ու նոր իշխանական տներից Արծրունիների, Բագրատունիների, Մամիկոնյանների, Օրբելյանների, Պռոշյանների, Ազիզբեկյանների զինանշաններին հակառակ, որոնցում նույնպես հիմնական խորհրդանիշն արծիվներն են, որոնք

լրենց ճանկերի մեջ պահում են որևէ կենդանու (եղնիկ, այծ, գառ, թռչուն), Վաչուտյանների զինանշանակիր քարի վրա քանդակված են գլխով դեպի աջ դարձած արու և էգ արծիվներ, որոնցից արուն կանգնած է էգի մեջքին և կտցով շոյում է վերջինիս վիզը: Այստեղ արտահայտված է սիրո, հավատարմության խորհուրդը և գործնականում գովերգում է արուի և էգի (տղամարդու և կնոջ, այս դեպքում՝ Վաչե Ա-ի և Մամախաթունի) միությունը: Որ Վաչուտյաններն այդ են ցանկացել ընդգծել, հավաստում են արծիվների զլխամասից դեպի աջ պատկերված հավերժության խորհրդանիշ մեծ և փոքր կենաց ծառերը: Ինչպես ընդհանուր քանդակը, այնպես էլ այն մատուցելու եղանակը, շատ նուրբ ու թափանցիկ ձև են սիրո, միության, բազմացման և հավերժության: Ներկայումս այս պատկերաքարը տեղադրված է Կաթողիկե եկեղեցու արևմտյան պատի քիվի տակ:



Անթրոդ

Երբ արդեն կառուցվում էր Կաթողիկե եկեղեցին, հարկ է եղել պատրաստել նույն զինանշանի ևս մեկ օրինակ և տեղադրել եկեղեցու, հավանաբար, արևմտյան արտաքին պատին: Այս զինանշանային քանդակը կրկնում է առաջինին ինչպես թռչունների տեղադրությամբ, այնպես էլ նրանց գլխի՝ դեպի աջ կողմ ուղղվածությամբ: Պակասում

են միայն կենաց ծառերը, իսկ թռչունների մարմինները ձևավորված են թեփուկաքանդակներով:

Ճննդաբանական ի՞նչ սկզբնաղբյուր ունի Վաչուտյանների որդեգրած էգ և արու արծիվների գուգաղըմամբ զինանշանը:



Մակարավանք



Նոր Վարագավանք

Իրար մեջքի կանգնած և դեպի աջ ուղղված զլուխներով արծիվներով հնագույն զինանշանը պատկերված է Աղթամարի Սուրբ Խաչ տաճարի պատկերաշարում՝ Համազասպ Արծրունու ձախ կողմում: Տաճարը կառուցվել ու քանդակագարդվել է 915-921 թվականներին, և, փաստորեն, այնտեղ պատկերված զույգ արծիվների քանդակը շուրջ երեք դարով նախորդում է Վաչուտյանների զինանշանին: Արծրունիների և Վաչուտյանների զինանշանների տարբերությունը միայն այն է, որ Աղթամարում վերևում կանգնած արու արծիվը քանդակված է թևերը թափահարելու դիրքով:



Գեղարդ



Գլաճոր

Ժամանակագրորեն՝ Հովհաննավանքի պատկերաքանդակներից մի քանի տարով ավելի վաղ, Վաչուտյաններն իրենց զինանշանը քանդակել են Մակարավանքի եկեղեցու բեմառեջքի ութաբևեռ աստղի

մեջ: Մակարավանքի եկեղեցու կառուցումն ավարտվել է 1205 թվականին: Եկեղեցին կառուցել է Բագազ իշխանի որդի Վարդանը:

Եթե Բագազ իշխանի և նրա որդի Վարդանի մասին այլուստ ոչինչ հայտնի չէ, ապա կարևոր է, որ այդ երկրամասի տերը Սաղուն իշխանն է:

Այս Սաղունը Կայենի և Մահկանաբերդի մեծ իշխան, աթաբեկ, ամիրսպասալար Սաղուն Բ-ի պապն է, Ամիր Քուրդ Արծրունու որդին: Փաստորեն, դարձյալ գործ ունենք Արծրունիների հետ և կարող ենք հավաստել, որ որդեգրելով զույգ արծիվների պատկերով զինանշանը, Վաչե Ա-ն, ամենայն հավանականությամբ, շեշտել է իր հարազատությունը Կայենի տեր Արծրունիների կամ վերջիններիս արյունակից կամ ենթակա Բագազ իշխանի տոհմերի հետ: Այդ է թելադրում նշանների, հատկապես զինանշանի որդեգրումը, որը չի կարող կամայական լինել, այլ պատճառաբանված ժառանգականության արդյունք է: Հավանաբար, նաև այս բարեկամությամբ պետք է բացատրել Վաչուտյանների անվանացանկ մտած Քուրդ անձնանունը:

Վաչե Ա-ի կենդանության օրոք նրա զինանշանը ևս մեկ անգամ պատկերվել է Հյուսիսային Հայաստանում՝ Նոր Բերդի (Տավուշ) Վարազավան գյուղից 2 կմ արևմուտք կառուցված Նոր Վարազավանք հողևոր համալիրի Սուրբ Աստվածածին եկեղեցու պատին: Եկեղեցին 1224-37-ական թվականներին կառուցել է Նոր Բերդի Դավիթ իշխանի որդի Վասակ Բ-ն: Եկեղեցու արևմտյան մուտքի աջ կողմում, բարձրուստ, վեցանկյուն եզրագիծ ունեցող սալիկի վրա փորագրված է Վաչե Ա-ի արծվանշանը, որը ևս հարևանան է Հովհաննավանքի քանդակապատկերների:

Վաչե Ա-ի որդեգրած զինանշանը ևս երկու անգամ պատկերվել է ժամանակակից կառույցների վրա: Դրանցից ժամանակագրորեն առաջինը փորագրվել է 1225-30-ական թվականներին կառուցված Գեղարդի համալիրի գավթի մուտքի վերնամասում, երկրորդը՝ 1273-79-ական թվականներին՝ Գլածորի Սուրբ Ստեփանոս եկեղեցու հարավային ճակատին: Սակայն այս երկու պատկերաքանդակներն առանձնանում են նրանով, որ արծիվները, հակառակ Հովհաննավանքի, պատկերված են գլխով դեպի ձախ դարձած:

Եթե Մակարավանքում և Նոր Վարազավանքում Վաչե Ա-ի զինանշանի առկայությունը կապվում է նրա այդ տարածքից սերված լինելու կամ այդ տարածքներում հարազատների ունենալու հանգամանքի հետ, ապա Գեղարդում և Գլածորում նրա զինանշանի փո-

րագրվելն այդ կառույցներին՝ Վաչե Ա-ի կամ նրա ժառանգների կողմից նյութական աջակցություն ցույց տալու արդյունք է:

Վաչե Ա-ի օրոք օգտագործված զինանշանը նրա հաջորդների ժամանակ ևս եղել է պաշտոնապես ճանաչված (Գլխձորի Սուրբ Ստեփանոս եկեղեցու քանդակն այդ կարծիքի վկայությունն է), սակայն հավանական է նաև, որ Վաչուտյան իշխանատոհմի ժառանգները շրջանառության մեջ ունեցել են զինանշանների այլ տարբերակներ ևս:

1250-ական թվականների սկզբին մահացած իրենց մանկահասակ դստեր՝ Մամախաթունի հիշատակին Քուրդ Ա-ն և Խորիշահը 1255 թվականին Սաղմոսավանքի համալիրում գրատուն են կառուցել:

Շինության կտորի տակ, խաչվող կամարներից մեկի վրա փորագրված են երկու բարձրաքանդակներ: Դրանցից մեկը մանկահասակ աղջնակ է, իսկ նրա կողքին՝ դիմահայաց պատկերով արծիվ, որը ճանկերով հենված է զուգահեռ ալիքներից կազմված կիսագնդի վրա: Այս արծվապատկերը հարդարանքի մաս չէ և քանդակված է որպես զինանշան: Հավանաբար, Քուրդ Ա-ի օրոք զինանշանի համար օգտագործվել է արծվի դիմահայաց պատկերը: Պետք է ընդգծել նաև, որ այս զինանշանի վրա ևս արծիվը ճանկող չէ և բռնություն չի խորհրդանշում:

Քուրդ Բ Վաչուտյանը 14-րդ դարի 30-ական թվականներին Կարբի գյուղում կառուցել է հաղթակամար-զանգակատուն, որի արևմտյան պատին 1338 թվակիր հիշատակագրական արձանագրությունից մի փոքր վեր, աջ կողմում կա մի բարձրաքանդակ, որը հաստատապես զինանշանի իմաստ ունի: Պատկերված է քևտարած, դիմահայաց արծիվ, որն ուղղահայաց դիրքով, հզոր ճանկերով հենված է հորիզոնական դիրքով թևերը մարմնին պինդ սեղմած և կողքի պառկած ինչ-որ թռչնի վրա: Այս զինանշանով Վաչուտյաններն առաջին անգամ ցուցանում են ուժի, իշխանության խորհրդանիշը:




## ԱԶԻԶԲԵԿՅԱՆՆԵՐԻ ԶԻՆԱՆՇԱՆԸ

Միջնադարյան այս իշխանական ընտանիքի պատմությունն սկսվել է 13-րդ դարի վերջերին և խոտորումներով շարունակվել է մինչև 17-րդ դարի կեսերը:


Ազիզբեկյանների տոհմի գործունեությունը ծավալվել է Վաչուտյան իշխանական տոհմի տարածքներում, Արայի լեռան արևելահայաց լանջերին և ընդգրկել է շատ փոքր տարածք՝ ներկայիս Եղվարդ ավանից մինչև Նոր Գեղի գյուղը:

Իշխանատան հիմնադիրը՝ Ավագի և Թամարի որդի Ազիզբեկը, ամենայն հավանականությամբ, այդ հողերին տեր է դարձել 1290-ական թվականներին, երբ մոնղոլ-թաթարների ասպատակությունների հետևանքով, ինչպես ամբողջ Հա-



յաստանը, այնպես էլ Վաչուտյանների իշխանատիրույթը հասել էր ծայրագույն քայքայման: Այդ օրերին էլ Ազիզբեկը, որ կամ Վաչուտյանների ազգականներից էր, կամ ծառայականներից (ենթակա իշխաններից կամ զորավարներից), ստացել կամ գնել է Եղվարդն իր շրջակայքով:

Ազիզբեկյանների շինարարական միակ գործը Եղվարդի Սուրբ Հակոբ եկեղեցին է: Այն եռահարկ (երկհարկ եկեղեցիով և սյունաշար զանգակատնով) կառույց է, ունի վերասլաց տեսք: Եկեղեցու մուտքի բարավորի վրա փորագրված արձանագրության համաձայն՝ այն կառուցվել է 1301 թվականին:



Եղվարդի Սուրբ Հակոբ եկեղեցու արտաքին պատերի վրա պատվիրատուի պահանջով փորագրվել են այդ տոհմի զինանշանները: Երկրորդ հարկի դռան վերնամասում քանդակված են թռչքի, կռվի պատրաստ առյուծ, իսկ ձախակողմում՝ առջևի ոտքերով ծնկի եկած, գլուխը խոնարհած և հակառակորդի վրա հարձակվելու պատրաստ ցուլ: Առյուծ և ցուլ են պատկերված նաև Սյունիքի իշխանների (Յաղաց քար), Չաքարյանների (Գեղարդ, Մակարավանք) զինանշանների որոշ տարբերակներում:

Եկեղեցու հարավային ճակատին փորագրված է դեմքով դեպի դիտողը դարձած, թևերը բաց, պոչի վրա հենված և ճանկերում հորթ բռնած արծիվ: Աշխատանքը կատարյալ քանդակագործական ստեղծագործություն է: Արծվի թևերը մշակված են ելունդավոր խորացումներով, դուրս ցցված կրծքին վարդյակ է փորագրված: Ցավոք, արծվի գլուխը կոտրված է, և դիտողը չի տեսնում քոչունի հայացքը, որն ավելի ամբողջականություն կհաղորդեր քանդակին:

Արևելյան պատին, պատուհանից վեր փորագրված է զինանշանային ևս մեկ տարբերակ. բծավոր վագրը գետին է տապալել եղնիկին, որի անշնչացած գլուխը կախված է կողքի:



## ԴՍԵՂԻ ՄԱՍԻԿՈՆՅԱՆՆԵՐԻ ՁԻՆԱՆՇԱՆԸ

Ծնվող յուրաքանչյուր հայ երեխա մայրական առաջին գորովագութ խոսքերից հետո լսում է հայ գորավարների, հայոց պատմության վերելքների ու վայրէջքների մասին: Եվ բոլոր պատմությունների մեջ ամենամեծ ակնածանքով տրվում են Հայոց աշխարհի պաշտպանության վահան դարձած Մամիկոնյան տոհմի ներկայացուցիչների անունները: Թե այս բնիկ հայկական ազնվական տոհմը ինչպիսի հերոսներ է ծնել, բավական է հիշել Վասակի, Մուշեղի, Մանվելի, Վարդանի, Վահանի, Վարդի, Դավթի, Գրիգորի անունները:

12-րդ դարի վերջերին, Միջին Արևելքում, Բյուզանդիայում, Վրաստանում ցրված Մամիկոնյան նախարարական տոհմի ճյուղերից մեկը հաստատվել է պատմական Գուգարքում, ներկայիս Դսեղ գյուղում: Այս նոր իշխանատան հիմնադիրը թեև Սարգիս Մամիկոնյանն էր, բայց նրա պապի՝ Համազասպի անունով տոհմը երբեմն Մամիկոնյանին զուգահեռ կոչվում է Համազասպյան:

Իշխանատիրույթը փոքրերից է: Այն միավորում էր ընդամենը Դսեղ, Մղարթ, Կարմիր քար, Կկվաշեն, Ծաղկուտ, Իգատակ բնակավայրերն իրենց շրջակա հողերով:


Իշխանատան հիմնադիր Սարգիս Մամիկոնյանն ակտիվորեն մասնակցել է Հայաստանի ազատագրության համար Չաքարյան եղբայրների մղած կռիվներին և 1201 թվականին, հավանաբար, Բջնին գրավելու համար մղված մարտերում զոհվել է ու մեծ շուքով թաղվել Չաքարյան տոհմի ընտանեկան հանգստարանում՝ Սանահինի վանքի գավթում: Նրա գերեզմանին մի հոյաշուք խաչքար է կանգնեցվել:



Այս իշխանական ընտանիքը խնամիական կապերով կապված էր միջնադարյան Հայաստանի անվանի իշխանական տների՝ Վաչուտյանների, Օրբելյանների, Չաքարյանների, Ուբանանց, Դոփյանների հետ: Ընտանիքի որոշ անդամներ եղել են Չաքարյանների գորավարները (Սարգիս Ա, Համազասպ Գ, Մամիկոն Գ), մի քանիսը նվիրվել են հոգևոր ծառայության, եղել են Հաղպատի (Համազասպ եպիսկոպոս), Հովհաննավաքի (Համազասպ և Ներսես եպիսկոպոսներ) առաջնորդներ: Չաքարյաններին մատուցած ծառայությունների համար հողային կալվածքներ են ստացել Ուրծ գավառում, Խաչենում:

Մամիկոնյան-Համազասպյան իշխանատունն իր իշխանանիստ-մայրաքաղաք է դարձրել Դսեղ գյուղը, իսկ հոգևոր կենտրոնը՝ Դսեղից 2 կմ հյուսիս-արևելք, Մարց գետակին հարող ձորալանջին կառուցած Բարձրաքաշ Սուրբ Գրիգոր վանքը:

Մամիկոնյան-Համազասպյան տան ներկայացուցիչների շինարարական գործունեության արգասիք են Դսեղ գյուղի Լուսավորիչ եկեղեցին, Բարձրաքաշ Սուրբ Գրիգոր վանական համալիրը, տասնյակ բարձրակարգ խաչքարեր, Դեբեդ գետի վրա 1247 թվականին կառուցված կամուրջը: Առավել ընդգրկուն է այս իշխանատան ներկայացուցիչների մշակութամասատ գործունեությունը: Տասնյակների է հասնում այն ձեռագրերի թիվը, որ պատվիրել են Դսեղի Մամիկոնյանները: Դրանցից Հովհաննավանքի առաջնորդ Համազասպ եպիսկոպոս Մամիկոնյանի պատվիրած ձեռագրերից միայն վեցն են հասել մեր օրերը և այժմ գտնվում են Երևանի Մեսրոպ Մաշտոցի անվան հին ձեռագրերի ինստիտուտում՝ Մատենադարանում:



14-րդ դարի կեսերին Մամիկոնյան-Համազասպյան իշխանատունը հեռացավ պատմության թատերաբեմից, սակայն նրանց հաջորդները շարունակեցին ապրել Դսեղում:

Մամիկոնյան նախարարական տոհմի զինանշանի մասին հավաստի տեղեկություններ չկան: Բայց ահա Դսեղի Մամիկոնյան-Համազասպյան իշխանատան զինանշանը պահպանվել է:

Դսեղ գյուղի Լուսավորիչ եկեղեցին ավելի վաղ շրջանի կառույց էր, բայց գյուղին տեր դառնալուց հետո՝ Սարգիս Մամիկոնյանը կամ նրա անմիջական հաջորդ Սմբատ Ա-ն, 1200

թվականներին բազիլիկ, միանավ եկեղեցին վերակառուցել են: Եվ վերակառուցման ընթացքում էլ հարավային ավանդատան արևելյան ճակատին, պատուհանի պսակից վերև տեղադրել են իրենց զինանշանը: Ուղղանկյուն քարի վրա քանդակված է դիմադարձ երկգլխանի արծիվ, որը ճանկերով պահում է գառան մարմինը: Հարթաքանդակը թև բավականին հողմնահարված-մաշված է, մանրամասները չբացել են, բայց արծվի պատկերը լավ երևում է:

Բարձրաքաշ Սուրբ Գրիգոր վանքային համալիրի գավթի արևելյան պատի հնգանիստ ծավալի կենտրոնական ճակատին, պատուհանից վերև մնում է նույն զինանշանի անխաթար օրինակը: Գավթի կառուցումն ավարտվել է 1247 թվականին: Այդ նույն ժամանակ էլ քանդակվել է զինանշանը. նույն երկգլխանի արծիվն է: Թռչնի գլուխները պատկերված են իրար նկատմամբ հակադիր դիրքով, գլխի մանրամասները լավ տեսանելի են, վիզը ձևավորված է եղևնաճախշով: Թևերը վերնամասում պարույրաձև գալարներով շրջան են կազմում և իջնում են ներքև՝ մինչև ճանկերը, որոնք խրված են գառան ողնաշարի մեջ և պինդ պահում են կենդանուն հզոր պոչի վրա: Գառը, ինչպես և Լուսավորիչ եկեղեցու պատկերում, ուղղորդված է գլխով դեպի ձախ ու դեմքով նայում է դիտողին: Աշխատանքը թև իրականացված է

առանց ավելորդ պաճուճանքների, սակայն քանդակագործական կատարյալ գլուխգործոց է:

Դիտարկելով Դսեղի Մամիկոնյանների զինանշանը՝ համոզված կարելի է պնդել, որ այն անպատճառ կապ ունի Մամիկոնյան տոհմի նախորդ շրջանի պատկերացումների, տոհմում ավելի վաղ գործածված զինանշանների հետ: Հավանաբար, իրենց զինանշանով Մամիկոնյան-Համագասպյան տան ներկայացուցիչները հաստատում են, որ իրենք աչալրջորեն հսկում են Մայր Հայաստանի սահմանները և նրա հողին աչք ունեցողներին կճգմեն զառան պես:



## ՀՈՆԵՆՑ ՏՈՀՄԻ ՁԻՆԱՆՇԱՆԸ

**Ձ**աքարյանների ինքնօրեն իշխանապետությունում և նոր իշխանությունների կողքին բարձրացան մահ ազնվական ծագում չունեցող, բայց հարստության տեր մեծատուներ, որոնք իրենց հարստության շնորհիվ հասան բարձր դիրքի, պաշտոնի, դարձան նոր տիրակալների՝ Ձաքարյանների տնտեսական ու քաղաքական հենարանը:

Տիգրան Հոնենցը Ձաքարյան շրջանի մեծահարուստներից մեկն է: Ապրել և գործել է իշխանապետության մայրաքաղաք Անիում, Ձաքարե Բ-ի ու նրա որդի Շահնշահ Ա-ի օրոք: Հավանական է, որ Ձաքարյանների կողմից 1199 թվականին Անին գրավելուց անմիջապես հետո՝ Տիգրան Հոնենցը նշանակվել է մայրաքաղաքի հարկային վերակացու: Այդ խելամիտ ու գործունյա անձնավորությունը կարճ ժամանակում հարկերի կապալառության, վաշխառության, առևտրի ճանապարհով կուտակել է մեծ հարստություն, գնել Անի քաղաքի մի քանի քաղամասեր, գյուղեր, հյուրատներ, առևտրական կրպակներ, ջրաղացներ, ձիթհաններ, այգիներ, ջրագծեր: Նա կալվածքներ ուներ ոչ միայն

Անիում ու շրջակայքում, այլև Մրենում, Կարսում, Երևանում, Կոշում: Նա Անիի ամենախոշոր մեծատուն էր, ամենահայտնի անձը, քաղաքում նրա անվամբ փողոց կար: Տիգրան Հոնենցի դերը երկրի տնտեսական կյանքում շատ մեծ էր:

Իր անբավ հարստությունը Տիգրան Հոնենցը ծառայեցրել է Անիի պաշտպանական, հոգևոր շինությունների, ջրագծերի կառուցման, մշակութային-լուսավորչական գործին:

Տիգրան Հոնենցի անունն առաջին անգամ հիշատակվում է 1213 թվականին: Այդ տարի մեծահարուստը նորոգել է Անիի Մայր տաճարը, կառուցել աստիճաններ, նվերներ ընծայել, այդ թվում՝ երկու ձեռագիր տոնական: Իսկ մինչ այդ, հավանաբար, 1200-ական թվականների կեսերին, Տիգրան Հոնենցի պատվերով Ախուրյանի կիրճի պոնկին գնված տարածքում կառուցվել է Գրիգոր Լուսավորիչ եկեղեցին, որը Անիի Չաքարյան շրջանի ճարտարապետական-կառուցողական զարդերից մեկն է: Հոյաշեն այս կառույցի շինարարությունն ավարտվել է 1215 թվականին: Այստեղ կառուցվել են նաև վանականների կացարաններ, իշխանական պալատ (ամենայն հավանականությամբ, հենց իրենց՝ Հոնենցների համար), բաղնիք, ջրագիծ: Այդ շինությունները շրջապատվել են հզոր պարիսպներով:

Տիգրան Հոնենցի Գրիգոր Լուսավորիչ եկեղեցին արտաքինից ծածկված է հարթաքանդակ գոտիով, իսկ ներսից՝ որմնանկարներով: Այն կառուցել է Հոնենց տոհմի ճարտարապետ Եղբայրիկը: Պատվիրատուն նորակառույց եկեղեցուն նվիրել է 8 գյուղ, 6 այգի, հյուրանոցներ, Հոտեցունց փողոցի տները, կրպակներ, երկուական բաղնիք, պանդոկ, երկակն ձիթհանք, 3 ջրաղացների հատվածներ, մի քանի ախոռ ու մարագ, բանջարանոցներ, տարբեր հողակտորներ: Իր չափերով Տիգրան Հոնենցի նվիրատվությունը կարող էր համեմատվել միայն Տաթևի վանքի օծման առթիվ, 906 թվականին Սմբատ Ա Բագրատունի թագավորի և Սյունյաց իշխանների ընծայած նվերներին:

Տիգրան Հոնենցի միջոցներով կառուցվել են նաև Բեխենց վանքը և Կուսանաց անապատի եկեղեցին: 1222 թվականին Տիգրան Հոնենցի միջոցներով ճարտարապետ Եղբայրիկը կառուցել է քաղաքային պարսպի բուրգերից մեկը, որ պատմական գրականության մեջ ստացել է Եղբայրիկի բուրգ անունը: Պարսպի մեջ ագուցված խաչքարի ստորին մասում արձանագրված է. «Ես՝ Եղբայրիկս, ծառայ տեսառն իմոյ Տիգրանայ, նորին ողորմութամբն շինեցի զարձանս»:

Տիգրան Հոնենցի կառուցողական զարդերից մեկն էլ Ծակոցածորի Այրային թաղամասի Հոնենց տոհմի պանթեոն-դամբարանն է, որի պատերը ծածկված են եղել տարբեր բովանդակությամբ որմնանկարներով: Դամբարանը պեղվել է 1910-ական թվականների սկզբին: Հայաստանի պատմության թանգարանի «Աճի քաղաքը» ցուցասրահում, պատերից մեկի վրա ցուցադրվում է նրբահյուս մետաքսից կարված փոքրիկ աղջնակի հագուստ: Այդ հագուստները գտնվել են հենց Տիգրան Հոնենցի դամբարանում: Այդ հագուստները եղել են 4-5 տարեկան մի աղջնակի հագին: Աղջնակի մարմինը զմռսված է եղել և լավ պահպանվել է՝ հագուստով հանդերձ: Ցավոք, դաժանաբար են վարվել աղջնակի մարմնի հետ. պարսկահայ բժիշկ Թաշշյանը երեխայի գլուխը կտրել և Պարսկաստան է տարել «որպես սեղանի զարդ», իսկ բժիշկ Կ. Բասմանջյանը Փարիզ է տարել մարմինը:

Գրիգոր Լուսավորիչ եկեղեցու թմբուկի նիստերից մեկի վրա ազուցված է դիմահայաց արծվի հարթաքանդակ, որտեղ թռչունը հզոր պոչի վրա մագիլներով պահում է գառան մարմինը: Այս պատկերը, սակայն, Չաքարյան տան զինանշանն է, և Տիգրան Հոնենցը այն իր կառուցած հոգևոր շինության վրա փորագրել է՝ հավաստելու համար իր անվերապահ ենթակայությունը Չաքարյան տանը:

Տիգրան Հոնենցը ևս ունեցել է զինանշան: Տիգրան Հոնենցի զինանշանին պատկերված են եղել արու և էգ առյուծներ: Այդ պարզվում է Հոնենց տոհմի դամբարանից հայտնաբերված ու Հայաստանի պատմության պետական թանգարանում պահվող դրոշի վրա եղած պատկերից: Ցավոք, պատմական գրականության մեջ դրոշը ներկայացվել է որպես շղարշ:

Դրոշը սև գույնի կտորից է: Սևի վրա ոսկեգօծ, նուրբ հյուսվածքով պատկերված են դեմ-դիմաց կանգնած զույգ առյուծներ: Չախ կողմում ավելի հզոր արուն է՝ ամբողջ մարմնով ձգված, կարծես թռիչքի պատրաստ, գլուխը տիրաբար վեր պարզած, պոչը տնկած: Նրա թիկունքին երևում է կենաց ծառը՝ իշխանատիրոջ, տոհմի հաջորդայնությունն ապահովողի նշանը, իսկ ներքևում պարզորոշ ընդգծված է հավերժության նշան՝ արևի կիսապատկերը: Աջ կողմում գլուխն իր տիրոջ մարմնին փարած հեգ ու խոնարհ կանգնած է էգ առյուծը:

Առյուծների մարմինների եզրագծերը, ինչպես նաև արուի բաշը գործած են ոսկե թելերով, իսկ մարմինները՝ մետաքսաթելով: Փաստորեն, ինչպես և Վաչուտյանների զինանշանին, որտեղ պատկերված են արու և էգ արծիվներ, Տիգրան Հոնենցի դրոշին պատկերված են արու և էգ

առյուծներ, որոնք խորհրդանշում են սիրո, ընտանիքի, հավերժության ուխտը:

Հայ իշխանական տների դրոշների մասին միայն հիշատակություններ կան: Պատմիչ Մխիթար Այրիվանեցին գրում է, որ յուրաքանչյուր իշխանական տոհմ ուներ իր դրոշն ու պատերազմական փողը, որ ժառանգաբար անցնում էր տոհմի ավագ ներկայացուցիչներին: Նույնն է հաստատում նաև Մխիթար Գոշը, գրելով, որ Մահկանաբերդի Արծրունի իշխան Վասակի մահվանից հետո նրա եղբայր Զուրդ Արծրունին ստացել է «գդրոշ նորա եւ զփոխ եւ զիշխանութիւն»: Թեև ընդունված է այն կարծիքը, որ որևէ հայ իշխանական տան դրոշ չի պահպանվել: Սակայն Անեցի մեծատուն Տիգրան Հոնենցի դրոշը, որի վրա հյուսված է վերջինիս զինանշանը, կարծիքի բացառումն է: Դրոշի սև գույնը և դամբարանում գտնվելը, ամենայն հավանականությամբ, սգո խորհրդանշան է:



## ԽԱՂԲԱԿՅԱՆՆԵՐԻ ՉԻՆԱՆՇԱՆՆԸ

**Ձ**աքարյան եղբայրների մղած ազատագրական կռիվներին մասնակցեցին Խաղբակ Խաչենցու զավակները: 1201-1203-ական թվականներին Վասակ Խաղբակյանը, նրա եղբայրներ Գրիգորը, Ջաջուրը, որդիներ Պապաք Ա-ն, Մզդեմը, Պոռչ Հասանը մասնակցել են Բջնիի, Դվինի, Վայոց ձորի համար մղված մարտերին: Հաղթական պատերազմից հետո Ձաքարյան Իվանե Ա-ն Վասակ Խաղբակյանին հանձնեց Կեչառիսից մինչև Վայոց ձոր, Արփա գետի վերին հոսանքներն ընկած հողերը՝ շնորհելով նրան իշխանական կոչում և տալով կողմնակալ-կուսակալի պաշտոնը: Վասակ Խաղբակյանն իր իշխանության մայրաքաղաք է դարձնում Սրկղունք ավանը (ներկայումս՝ Եղեգնաձորի տարածաշրջանի Վերնաշեն գյուղը): Գրիգոր Խաղբակյանին տրվեց Ուրծ գավառի մի մասը (ներկայումս՝ Արարատի տարածաշրջանի հյուսային մասը):

Նոր իշխանատունը տոհմի հիմնադիր Վասակի հոր անունով ի սկզբանե կոչվեց Խաղբակյան, սակայն ի պատիվ Վասակի որդի ու իրավահաջորդ Պոռչ Հասանի՝ ստացավ նաև Պոռչյան անվանումը:

Ձաքարյան իշխանապետությունը և բովանդակ հայ պատմությունը շատ աղքատ կլիներ առանց այս առնական, շինարար, մշակութամպաստ տոհմի:

Անկախ նրանցից, թե երկրում ինչպիսի իրադրություն էր, հարմար թե անհարմար, միևնույնն է, հայը պետք է կառուցեր և կառուցեր հիմնավոր:

Կառուցեր բերդեր, որ պաշտպաներ իր ինքնությունը, կառուցեր եկեղեցիներ, գրատներ, դպրանոցներ, համալսարաններ, որ իր ոգուն հավերժություն ապահովեին: Եվ Խաղբակյան տան բոլոր սերունդները իրենց իշխանատիրություն կանգնեցին ազգանպաստ այդ մեծ գործի գլուխ: Արդեն 1214 թվականին Վասակ Ա-ի պատվերով ավարտվում է Կեչառիսի Կաթողիկե եկեղեցու կառուցումը: Սրան հաջորդում են Գլաձորի սուրբ Ստեփանոսը, Ռծուպը, Կուչին, Վանստանը, Աղջոց Սուրբ Ստեփանոսը, այլ կառույցներ: Բայց այս տոհմի շինարարական գործունեության գլուխգործոցը, անշուշտ, 13-րդ դարի 40-ական թվականների Պողո Հասան իշխանի կողմից Ջաբարյան Ավագից զնված Գեղարդավանքում 1280-ական թվականներին փորված վիմափոր եկեղեցիներն են:



Իշխանական այս տոհմից են սերվել բանաստեղծ Խաչատուր Կեչառեցին և հոգևոր գործիչ Ջաբարիա Գնունյաց եպիսկոպոսը:

Խաղբակյանները մինչև 13-րդ դարի սկիզբը հողային տիրույթներ ունեին Խաչենում, իբրև իշխանական տոհմ՝ հնարավոր է ունենային նաև զինանշան, սակայն այդ մասին հավաստի տեղե-

կություններ չկան: Իսկ երբ նրանք տեղ դարձան Կեչառիսից մինչև Արփա գետն ընկած հողերին և ստանձնեցին կուսակալի պաշտոն, որդեգրեցին նոր զինանշան:

Նոր զինանշանն ընդունվել է Վասակ Ա-ի օրոք և առաջին անգամ հանդիպում է Կեչառիսի Կաթողիկե եկեղեցուն: Պատկերագրության առանցքը դիմահայաց արծիվն է, որը մագիլներով բռնել է խոյի ողնաշարից: Ջինանշանը կրող բարը նախապես եղել է Վասակաշեն Կաթողիկե եկեղեցու պատին, բայց հետագայում ցած է ընկել: Ջինանշանային այս պատկերագրության ընտրությունը, հավանաբար, կայանում է նրանում, որ Վասակ Ա Խաղբակյանը ցանկացել է հաստատել, որ իրենք՝ Խաղբակյանները, հանդիսանում են Սյունյաց



թագավորության իրավահաջորդները, և այլ ժառանգականությունը ապացուցում են վերջիններիս զինանշանը սեփականելով:

Խաղբակյան տոհմի հաջորդներկայացուցիչները հետագայում լրացնելով, հարստացնելով պատկերավորման մանրամասները՝ հավատարիմ մնացին որդեգրած զինանշանին:



Գլաձորի համալսարանի Սուրբ Ստեփանոս եկեղեցու գմբեթի քմբուկի հարավային պատուհանի պսակից վեր, արտաքուստ, կառուցման ժամանակ տեղադրվել է իշխանատիրության զինանշանը: Պատկերաքանդակը կրկնում է Կեչառիսի զինանշանը: Այստեղ ևս արծիվը պատկերված է դիմահայաց: Գլուխը տիրական տեսք ունի, աչքերը խիստ են, կտուցը՝ զորեղ: Թռչնի թևերը ամբողջովին բաց են, վերնամասում դրանք ձևավորված են զիգագա նախշազարդով, որոնք այնուհետև զուգահեռ ակոսներով իջնում են մինչև թևերի ծայրը: Կուրծքը լիքն է, ամուր, ձևավորված անկանոն՝ մեծ ու փոքր շրջանակներով: Հզոր մագիլներով սեղմել, գամել է գլխով դեպի աջ դարձած խոյին: Կենդանու՝ դիտողին ուղղված հայացքը, ցավից բնականորեն ձգված ոտքերն ավելի են ընդգծում արծվի կամքը, ուժը: Արծվի մարմնի չորս անկյուններում գեղագիր տառերով փորագրված է եկեղեցու կառուցման քվականը՝ «Թ (վին) ՉԻԲ(1273)»:

Խաղբակյանների զինանշանային տարբերակներից մեկը Գեղարդի վիմափոր գավիթում է: Սրահի երկու կամարները միացնող սյան զլխին երևում է ցուլի գլուխ՝ բերանից օղակ կախված, որից շղթայված են երկու իրար դեմ-հանդիման կանգնած և դեմքով դիտողին դարձած առյուծներ, որոնց պոչերի ծայրերն ավարտվում են վիշապի զլուխներով: Շղթայի տակ, կենտրոնական մասում պատկերված է դիմահայաց, թևերը կիսաբաց, կուրծքը բնականորեն դուրս ցցված արծիվը, որը մագիլներով պահում է խոյի ողնաշարից: Գլաձորի պատկերաքանդակին հակառակ՝ այստեղ խոյը զլխով դարձած է դեպի ձախ, իսկ ամբողջ քանդակաշարքը մատուցված է առանց մանրամասների ընգծման, հարթ մշակմամբ: Սակայն ամբողջական պատկերը խիստ ազդեցիկ է ու խոսուն: Առյուծները կերպավորում են Պռոշ Հասանի Պապակ Բ և Ամիր Հասան Ա որդիներին, որոնք հավերժորեն կապված են հայրենիքի պաշտպանության շղթային:


Խաղբակյանների իշխանանիստ-մայրաքաղաքում՝ Սրկղունք գյուղում, կառուցվել է պալատ (դարբաս): Պալատի մուտքի բարավորին քանդակված է եղել տոհմական զինանշանը՝ դեմ-դիմաց կանգնած զույգ առյուծներով, սակայն այդ քարը հետագայում օգտագործվել է այլ նպատակով, և առյուծների պատկերները փշրվել են:

Հետաքրքիր լուծում է տրված պատմական Գոմք գյուղում, 1277 քվականին կառուցված որմնափակ խաչքարին: Գոմք գյուղի որմնափակ խաչքարը կառուցվել է Խաղբակյանների տան ծառայական Խոյդանի որդիների՝ Մխիթարի և Արևիկի պատվերով: Որմնափակ

խաչքարի արևելյան կամարին, պատուհանից վերև քանդակված է իշխանատիրության տերերի՝ Խաղբակյանների զինանշանը՝ դիմահայաց, կլիսաբաց թևերով արծիվը, որ մագիլներով ճզմել է դեմքով դեպի ձախ դարձած խոյին: Այս քանդակի արծիվը ձևով կրկնում է Գեղարդի վիմափորի արծիվին, բայց մշակմամբ նման է Գլաձորի Սուրբ Ստեփանոսի թմբուկի վրա եղած քանդակին:

Հետաքրքրական է, որ նույն որմնափակ խաչքարի արևմտյան կողմում, ներքևի ճակատին պահպանվել է ևս մեկ զինանշանային քանդակ. իրար դեմ-հանդիման կանգնած են առյուծ և ցուլ: Ինչպես Գեղարդում՝ Խաղբակյանների տոհմի հիմնական զինանշանում, այստեղ ևս առկա են առյուծը և ցուլը: Հավանական է, որ որմնափակ խաչքարի նաև այս զինանշանային պատկերաքանդակը նույնպես պատկանում է Խաղբակյաններին: Որմնափակ խաչքարը, որ նույնաբնույթ հուշարձանների մեջ լավագույններից է, ինչպես նաև զինանշանները, պատրաստել են քարգործ վարպետներ Մխիթարը և Շնորհավորը:

Մեծանուն հայագետ Գարեգին Հովսեփյանցը դարասկզբին Գոմբ գյուղի մոտ գտնվող Թարփի գյուղատեղում տեսել, նկարագրել է մի խոյածև տապանաքար, որը պատրաստվել է 1264 թվականին, Փուրդուլի եղբոր՝ ճուրղուլի հիշատակին: Տապանաքարի մի երեսին դեմ առ դեմ կանգնած են շղթայից զարկված առյուծ և ցուլ, իսկ մյուս երեսի պատկերների մեջ առկա է մագիլների մեջ խոյ բռնած արծիվը: Փաստորեն, տապանաքարի վրա առկա են Խաղբակյան տոհմի զինանշանային պատկերները:





## ՕՐԲԵԼՅԱՆՆԵՐԻ ՁԻՆԱՆՇԱՆՆԵՐԸ

**Ձ**աքարյանների իշխանապետության հզոր, ինքնօրեն իշխանատուներից են Օրբելյանները: Մոր կողմից Բագրատունիներից սերված Օրբելյանները, որ տիրույթներ ունեին Լոռիում և Չորագետում, Հայաստանի արևելյան սահմանագլխին հայտնվեցին 12-րդ դարի վերջին:

Էլիկում Ա-ն, հավանաբար, 12-րդ դարի 70-ական թվականներից Ատրպատականի, Առանի և Նախճավանի կառավարիչ Մուհամեդ Փախլավանի կողմից նշանակվեց Երնջակ բերդի, Ճահուկ ավանի, Քալասարահի գորքերի գլխավոր: Նա ամուսնացավ տեղական մեծահարուստ Աբաս Ճահիկեցու և Սյունյաց Ստեփանոս եպիսկոպոսի քրոջ աղջկա՝ Խաթունի հետ, որը կարևոր դեր կատարեց նրա քաղաքական կողմնորոշման գործում դեպի հայկականն ու հայությունը: Նա զոհվում է 1184 թվականին, Գամձակի ճակատամարտում: Միակ որդին՝ Լիպարիտ Գ-ն, մոր հետ արգելափակվում է Նախճավանում:

Իսկ հայ-վրացական զորագնդերն արդեն մոտենում էին Սյունիքին: Ստեփանոս եպիսկոպոսը դիմում է Իվանե Ա Չաքարյանին, Թամար թագուհուն, վերջինիս որդի Գեորգի Լաշային և նրանց հովանավորությամբ կազմակերպում քրոջ որդու փախուստը Նախճավանից: Իվանե Ա Չաքարյանը Լիպարիտ Գ-ին նշանակում է Սյունիքի վրա հարձակվող զորաջոկատներից մեկի հրամանատար: Լիպարիտ Գ-ն կռվում է քաջաբար և Սյունյաց լեռնաշխարհն ազատագրելուց հետո Իվանե Ա-ից տիրույթներ է ստանում Գեղարքունիքում, Վայոց ձորում, Կոտայքում, Ուրծում: Այս Լիպարիտ Գ-ով էլ սկսվում է Օրբելյան իշխանատոհմը:

Օրբելյան իշխանատոհմը հայ իրականությանը տվել է ականավոր ռազմական, քաղաքական և հոգևոր գործիչներ: Լիպարիտ Գ-ի որդի Սմբատ Բ-ն, որ մոնղոլների տիրապետության պայմաններում այնքան հզոր դիրք ուներ Հայաստանում և մոնղոլական արքունիքում, որ իր իշխանատիրություն ինքնօրեն արքա էր ճանաչված, Տարսայիճ Ա-ն, վերջիններիս ժառանգներն ավելի քան երեք ու կես հարյուրամյակ տիրեցին երկրամասին՝ կռվելով բազում թշնամիների դեմ, անխարդախ ծառայելով հայ ժողովրդի հարատևության գաղափարին:

Օրբելյան տոհմի հոգևոր կենտրոններում՝ Տաթևում և Նորավանքում, ինչպես նաև ընդարձակ իշխանատիրության մշակութային մյուս օջախներում՝ Հերմոնում, Ցաղաց քարում, Եղեգյաց անապատում, Մաքենյաց վանքում, Գնդեվանքում, Մամասի վանքում և այլուր, նրանց հովանավորությամբ ստեղծվեցին հարյուրավոր մեծարժեք ձեռագրեր: Գլաձորի համալսարանի փակվելուց հետո, Օրբելյանների նպաստավորմամբ՝ բարձր տիպի միջնադարյան ուսումնական հաստատությունը վերաբացվում է Տաթևում և իր գործունեության ընթացքում հայ մշակույթի սպասավորների պատրաստման գործում անգնահատելի դեր կատարում:

Մեծ է Օրբելյանների իշխանատոհմի ծավալած շինարարական գործունեությունը: Ավելի քան մեկ դարի ընթացքում Օրբելյան տան տարբեր իշխանավորներ (Լիպարիտ Գ, Սմբատ Բ, Տարսայիճ Ա, Բուրթիլ Բ) կառուցել են Նորավանքի հոյաշեն եկեղեցիները, գավիթը, տոհմական տապանատունը: Այստեղ աշխատել ու շինությունները կառուցել են միջնադարյան Հայաստանի հանճարեղ ճարտարապետներ Սիրանեսն ու Մոմիկը: Օրբելյան տան պատվերով են կառուցվել Արենիի հոյաշեն եկեղեցին, Սելիմի իջևանատունը, Սուրբ Կարապետը, բազմաթիվ բերդեր, պալատական շինություններ:

Օրբեյանների տոհմը խնամիական կապերով կապված էր ժամանակաշրջանի մյուս հայկական իշխանատոհմերի հետ, իսկ Տարսայիճ Ա-ի Էլիկում որդու շառավիղ Բեշքեն Բ-ի դուստրը 15-րդ դարի առաջին կեսին Վրաստանի թագուհին էր, իսկ որդին՝ Ռուստամը, հասավ կարա-կոյունլու թուրքմենների պալատական մեծ վեզիրի պաշտոնին և նպաստեց Սյունիքում ու Այրարատում իր տոհմի իշխանությունը որոշ ժամանակով ամրապնդելուն:

Օրբեյանների իշխանատոհմի առաջին ներկայացուցիչների շրջանից գինանշանային պատկերներ չեն պահպանվել: Այն օրինակները, որ հասել են մեզ, վերաբերում են 14-րդ դարի սկզբին և առաջին կեսին:




Ջինանշանային երկու պատկերներ պահպանվել են Օրբեյանների տոհմական տապանատանը՝ Նորավանքում:

Կառուցման թվականով վաղագույնը Սմբատ Բ-ի դամբարանում գտնվող Տարսայիճ Ա-ի որդի Էլիկում Դ-ի տապանաքարի բարձրա-




քանդակն է: Այն պատրաստված է 1310-ական թվականներին: Տապանաքարի վրա փորագրված է հասակով մեկ կանգնած առյուծ, որը մարմնի վերնամասով շրջվել ու նայում է դիտողին: Առջևի թաթերը հպված են կողերին: Դեմքը տիրական է, խորն ընկած աչքերը՝ վեհ ու հերոսական, մեջքին առկա է բծավոր բաշը: Պռչը ոտքերի միջնամասով փաթաթված է ոտքին: Առյուծի պատկերով զինանշաններ ունեն Ջաքարյանները, Վահրամյանները, Պռոշյանները, Հոնենք, սակայն այստեղ այլևս պայմանականություն չկա, և որպեսզի պարզ լինի, որ, իրոք, տապանաքարի վրա զինանշան է պատկերված, ընթերցենք տապանագիրը. «Թվիս ԳԽԹ (1300): Ջգեղեցկատիպն Էլիկում, որդի մեծի Տարսայիճին որ առյուծաբուն խորոխտ մորենչեր ընդեմ այլասեռ գնդին...»:

Արձանագրությունից հետևում է, որ Էլիկում Դ-ն առյուծաբար կոչվել է այլացեղ թշնամիների դեմ: Հավանաբար, նույն պատկերը եղել է նաև նրա դրոշի վրա: Բուրթելաշեն եռահարկ եկեղեցու հյուսիսային պատի արևմտյան կողմում, պեղումների ժամանակ գտնվել է մագիլներով գառ բռնած արծվի արձանային քանդակ: Պատմաբանները կարծում են, որ քարը նախապես եղել է եկեղեցու վերնամասում, երկրորդ հարկի ճակատային մասում: Ջինանշանը պատրաստվել է եկեղեցու կառուցման ժամանակ՝ 1330-ական թվականներին: Ջինանշանը, ինչպես և եկեղեցին, հավանաբար, կերտել է Մովսիկ ճարտարապետը: Արծիվը պատկերված է դիմահայաց, հզոր, տիրական գլխով, ուղղորդված, սուր հայացքով: Թևերը մարմնից հեռացած ու ուղղահայաց իջնում են ներքև: Հոդերի մասում ձևավորված են կլոր վարդյակով, իսկ ընդհանրապես՝ զուգահեռ փոսիկներով: Մարմնի ներքնամասից սկիզբ առնող ոտքերը մշակված են թեփուկաքանդակային եղանակով: Հզոր մագիլներով հենված է գառան ողնաշարի վրա: Թեև վերջինիս մարմնի ոչ մի մանրամասնը շեշտված չէ, բացի ականջներից, բայց պատկերված է իրական գծերով: Կենդանու վիզը մարմնի համեմատ երկար է, ինչը երբեմն գառը եղնիկի հետ շփոթելու պատճառ է դառնում: Կենդանին պատկերված է առջևի ոտքերը ծալած, ծնկած վիճակում և լիովին արտահայտում է Օրբելյան



իշխանավորի գերագահ դիրքը շրջապատի թշնամիների նկատմամբ, որոնց պահել է ծնկաչոք վիճակում: Հիշատակարաններում հենց այդպես էլ խոսվում է Բուրթել Բ-ի մասին, որ ժամանակակիցներից ստացել է Մեծ հորջորջումը:



Չիվա

Սակայն արծվաքանդակի այսօրինակ մոտիվով զինանշանը Օրբելյան տոհմում առաջինն օգտագործել է Բուրթել Բ-ի հորեղբայր Ջալալ Օրբելյանը: Ջալալը Տարսայիճ Ա-ի և Մինախաթունի որդին է: Նրա տիրույթները գտնվում էին Ուրծածոր և Արած գավառներում (ներկայումս՝ Արարատի և Եղեգնաձորի տարածաշրջաններում): Իշխանատիրույթի մայրաքաղաքը Չիվա գյուղն էր, որը 1298 թվականին նա վաճառեց ավագ եղբորը՝ պատմիչ Ստեփանոս


Օրբելյանին: Ջալալի կինն էր Ջաքարյան տոհմից Իվանե Բ-ի դուստր Գոնցան: Նրանք միասին ներկայիս Արածո գետի (Արարատի տարածաշրջանում) վերին հոսանքում կառուցել են Սուրբ Կարապետ վանքը, որ կոչվել է նաև Սպիտակավոր Աստվածածին: Ահա այս կառույցում էլ պահպանվել է արծվի բարձրաքանդակով զինանշանը: Այն առանձին քարի վրա է: Արծիվը դիմախայաց, կիսաբաց քներով է, մշակված է թեփուկաքանդակային եղանակով, մագիլներում ճզմել է գառան ողնաշարը: Ջինանշանակիր քարը նախապես ագուցված է եղել եկեղեցու պատի մեջ ու հետագայում շենքի քանդվելու պատճառով ընկել է եկեղեցու ներսը: Եկեղեցու կառուցումն ավարտվել է 1301 թվականին: Այդ նույն ժամանակ էլ, հավանաբար, պատրաստվել է զինանշանը: Տարիներ շարունակ հավատացյալները արծվակիր քարի վրա մոմ են վառել, որի հետևանքով զինանշանը ծածկվել է մոմի մնացորդներով ու սևացել:

Փաստորեն, նույնապատկեր արծվակիր զինանշան ունեցել են Տարսայիճ Ա-ի որդիներ Էլիկում Գ-ի և Ջալալի ճյուղերը:

Իսկ ահա Տարսայիճ Ա-ի եղբոր Իվանե Գ-ի թոռը՝ Լիպարիտ Գ-ի որդի Չեսար իշխանը, որի տիրույթները տարածվում էին ներկայիս

Գլաձորի և Վերնաշենի սահմաններում, զինանշանի համար ընտրել է այլ կենդանու՝ ցուլի պատկերը: Այն քանդակված է 1332 թվականին կառուցված Սելիմի իջևանատան մուտքի ձախ կողմում, վերնամասում: Յուրը պատկերված է զոհի վրա հարձակվելու պահին: Առջևի ոտքերը համաչափորեն ծալված են, պոչը ցցված է մեջքի վրա: Կենդանին դեմքով նայում է դիտողին: Կիսակլոր եղջյուրները նույնպես շեշտում են ցուլի կատաղությունը:

Խաղբակյան իշխանատոհմի ներկայացուցիչները, որ Օրբելյանների հարևաններն էին, ի սկզբանե որդեգրեցին Սյունյաց իշխանատան զինանշանային պատկերասրահի կենդանիներից (արծիվ, առյուծ, ցուլ)՝ դրանով հաստատելով իրենց ժառանգական իրավահաջորդությունը Սյունյաց իշխանատան նկատմամբ: Մինչդեռ Օրբելյանների իշխանատան առաջին ներկայացուցիչները, որոնք եկվոր էին, գիտակցաբար չլիմեցին այդ պատկերասրահին, իսկ մեկ հարյուրամյակ անց նրանց ժառանգներն օգտագործեցին դրանք:



## ՇԱՀՈՒՌՆԵՑՈՑ ՉԻՆԱՆՇԱՆԸ

**Օրբեյանների** իշխանատիրություն ճանաչման է արժանացել Շահուռնեցոց տոհմը: Այս տոհմի նշանավոր ներկայացուցիչը Վահրամ Շահուռնեցին է, որ Օրբեյանների գորաբանակի սպարապետն էր: Հավատարիմ ծառայության համար այս քաջագուն զորավարը 13-րդ դարի 70-ական թվականներին Տարսայիճ Օրբեյանից որպես կավածք ստացել է Վայոց Ձորի Հերիեր գյուղը՝ իր շրջակայքով:

Վահրամ Շահուռնեցուց հետո նրա գործը շարունակել են որդիները՝ Ուքանը, Ամատը, Հասանը: Թե՛ Վահրամը, թե՛ որդիները նահատակվել են թշնամիների դեմ մղված մարտերում:

1340-ական թվականներին իշխանատիրության գահերեց տերերից Բեշքեն Օրբեյանն իր որդի Կուկային ամուսնացնելով Ամատի միակ դուստր Նաթիլի հետ՝ տիրացավ պատմության թատերաբեմից հեռացած Շահուռնեցոց տիրույթներին:

Հերիեր գյուղից մեկ կիլոմետր հյուսիս-արևելք, երկու ձորերով եզերվող բլրի գագաթին գտնվող հնագույն Սուրբ Սյուն միանավ եկեղեցու հարավային պատին կից, Վահրամ Շահուռնեցու օրոք, 1282-83 թվականներին կառուցվել է Սուրբ Աստվածածին միանավ, թաղակապ եկեղեցին:


Սուրբ Աստվածածին եկեղեցու հարավային ճակատի միակ

պատուհանի պարակալի գլխին տեղադրված է Շահուռնեցոց տոհմի զինանշանը:

Գլմահայաց արծվի արձանային քանդակը հիմնականում կրկնում է գահերեց տերերի՝ Օրբելյանների զինանշանը: Արծիվը թևաբաց դիրքով, մարմնի միջնամասից սկսվող ամուր մագիլներով հենված է պատուհանի պսակին: Մարմինը լիքն է, ծավալուն, ձևավորված պարուրաձև կլորացող շրջանակներով: Գլուխը կլոր է, հզոր կտուցը մի փոքր խոնարհված է, խոշոր աչքերով հետևում է իր մարմնի տակ սեղմված ու ողնաշարաջարդ արված խոյին: Արծվի բաց թևերը, ընդհանուր բացվածքին համապատասխան, ձևավորված են զուգահեռ ակոսներով: Գլխով դեպի ձախ ուղղված խոյի մարմինը չի երևում. արծվի մարմինն այն ամբողջովին ծածկել է, ձախ կողմի թևի բացվածքի վրա երևում է խոյի առավել մանրամասն մշակված գլուխը, որ ուղղված է դիտողին: Խոյի անպաշտպան ու տառապագին վիճակն արտահայտվում է վերջինիս դուրս ընկած աչքերով:

Շահուռնեցոց զինանշանային արծիվը մատնանշում է վերջիններիս ուժը, հզորությունը և թշնամիներին ճգմելու, ոչնչացնելու համոզմունքն ու վստահությունը:

## ՄՇԿԱՎԱՆՔԻ ՉԻՆԱՆՇԱՆԸ



**Մ**շկավանքի (կամ Մշակավանքի) եկեղեցական համալիրը գտնվում է Լոռու մարզի Կողբ գյուղի մոտ:

Պատմականորեն Կողբ գյուղի տարածքը մտել է Մեծ Հայքի Գուգարք նահանգի, իսկ 11-12-րդ դարերում՝ Տաշիր-Ձորագետի կամ Կյուրիկյան թագավորության կազմի մեջ՝ ընդգրկելով Կողբափոր գավառը և Կանգարքի մի մասը: 1113-ին Կյուրիկյան թագավորությունն ընկավ և Կողբափոր գավառը միացվեց սելջուկյան Գանձակի ամիրայությանը: 1124 թվականին Վրաց Դավիթ թագավորն ազատագրեց այդ տարածքները և միացրեց Վիրքին: 12-րդ դարի վերջին Կողբափորը և հարակից իողերն անցան Իվանե Ջաբարյանի տիրապետության տակ:

Մշկավանքի Սուրբ Աստվածածին եկեղեցական համալիրը կառուցված է անտառապատ բլրի բարձրադիր հարթակի վրա: Այստեղ պահպանվել են Սուրբ Աստվածածին եկեղեցին, սրան արևմուտքից կից գավիթը՝ անկյունային խցերով:

Պատմիչ Վարդան վարդապետի հաղորդման համաձայն՝ 1119 թվականին այստեղ եղած եկեղեցին երկրաշարժից փլվել է:

Ե՞րբ և ո՞վ է կառուցել ներկայիս եկեղեցախումբը՝ հայտնի չէ:

Եկեղեցին հատակագծում քառակուսի միանավ դահլիճ է՝ ծածկված կիսազլանաձև թաղով՝ բարձրադիր երկթեք կտուրով:


Եկեղեցու արևելյան ճակատին առկա է կոմպոզիցիոն բարդ պատկեր:

Խորանի պատուհանի կենտրոնից ուղղահայաց բարձրանում են երկու գուգահեռ եզրակալներ, որոնք չմիանալով՝ գծում են կլոր շրջանակ, ապա կրկին բարձրանում և նետի ծայրակալի տեսք ընդունելով՝ կազմում են խաչի հիմքը: Նույն եզրակալները, դեպի վեր բարձրանալով, անթերի ոճավորված խաչի կառույցի մաս են դառնում:

Այլ եկեղեցիների վրա ևս այսպիսի ոճավորված խաչեր կան: Այստեղ առանձնահատկությունն այլ է: Խաչն իր կառույցով վերածվել է զինանշանի: Խաչի վերին թևի վերնամասում պատկերված է դիմահայաց ցուլի գլուխ: Տեղի եռանկյունաձև տարածքին համապատասխան՝ հարթաքանդակի եղանակով իրականացված քանդակն արտահայտիչ երևում է. կարճ կոտոշներ, կլոր գլխամաս, նեղացող դնչամաս, նշաձև աչքեր:

Այս պատկերի զինանշան լինելը (այլ կերպ այն չէր հայտնվի խաչի վերին թևի ներսում) հաստատող մյուս մանրամասնը խաչի հիմքի և պատուհանի միջև գտնվող կլոր շրջանակն է, որը փոխարինում է օղակին՝ իշխանության նշանին: Շրջանի ներսում փորագրված հնգաթև աստղի թևերի միջև ռոմբաձև տարածքում առկա հինգ գնդերը ևս հաստատում են, որ ամբողջ պատկերը զինանշանային է:

Երկրամասի թե՛ նախկին տերերը՝ Կյուրիկյանները, թե՛ եկեղեցու կառուցման ժամանակակից տերերը՝ Չաքարյանները, իրենց զինանշանին ցուլ չեն պատկերել: Ամենայն հավանականությամբ, սա տեղացի որևէ իշխանի զինանշանն է:



## ԱՎԱՆԻ ՍՈՒՐԲ ՀՈՎՀԱՆՆԵՍ ԵԿԵՂԵՑՈՒ ԽՈՐԱՆԻ ԶԻՆԱՆՇԱՆԸ

Երևան քաղաքի հյուսիս-արևելյան եզրին է գտնվում Ավանի Սուրբ Հովհաննես Եկեղեցին: Այն արևելքից-արևմուտք ձգված ուղղանկյուն տեսքով շինություն է: Կառուցված է տեղական սրբատաշ տուֆ քարով:


Եկեղեցու կտուրն ամբողջովին ավերված է: Տեղում պահպանված մանրամասները թույլ են տալիս ճշտելու, որ այն սկզբնապես կառուցվել է 4-5-րդ դարերում և այնուհետև մի շարք անգամներ նորոգվել, փոփոխությունների է ենթարկվել, ինչպես նաև պահպանված վիճակում ունեցել է միաթռիչք երկթեք ծածկով կտուր:

Եկեղեցին ավերվել է 1679 թվականի ահեղ երկրաշարժից և այլևս չի վերականգնվել:

Եկեղեցու արևմտյան արտաքին պատին պահպանվել է շինության հնագույն վիմագիր արձանագրությունը: Այն փորագրված է 1271 թվականին: Ցավոք, արձանագրությունը կիսատ է. և պարզ չէ, թե ով է հեղինակը:

Եկեղեցու խորանի ճակատային մասը շատ հետաքրքիր ձևավորում ունի:

Գլանաձև եզրակալով ուղղանկյուն հարթության կենտրոնական մասում քանդակված է կլոր գունդ, որը ձևավորված է մանրաքանդակ նախշերով և իր վրա ունի տարբեր կտրվածքներով խորացումներ: Գնդի երկու կողմերին փորագրված են արծիվներ: Արծիվներն ունեն միատեսակ, համաչափ կառուցվածք: Ոտքերով, բաց քերթի եզրերով և



պոչով նրանք հենված են գնդի վրա: Արծիվների թևերի գլխամասային հատվածները և ընդգծված կրծքամասերը մշակված են իրար վրա նստած ռոմբավոր խորացումներով, իսկ պոչը և թևերի եզրային մասերը՝ զուգահեռ ակոսներով: Արծիվների հզոր ճանկերը խրված են գնդի նախշերի մեջ: Արծիվների գլուխները կտրված են: Ամբողջ քանդակն իրականացված է կլոր քանդակի եղանակով և ավարտուն ու կատարյալ է:

Պատկերը հարդարանքի մաս չէ: Այստեղ գունդը իշխանության, իսկ զույգ արծիվները ուժի խորհրդանիշ են, այն ներկայանում է իբրև զինանշան:

Դժվար է ասել, թե զինանշանն ու՞մ է պատկանել և ե՞րբ է ստեղծվել: Ժամանակի հարցը, թերևս, կարող է լուծել զինանշանի ծախ կողմում փորագրված արձանագրությունը: Այն նույնպես փորագրվել է 1271 թվականին: Արձանագրությունը փորագրվել է Մեվանի որդի Ավանշահի անունից՝ եկեղեցու հերթական նորոգման առթիվ:

Ամենայն հավանականությամբ, խորանի ճակատակալ քարն իր վրա փորագրված զինանշանով այդ նորոգման արյույնքն է և պատրաստվել ու տեղադրվել է 1271 թվականին: Զինանշանը պատկանո՞ւմ է այս ոչ այնքան հայտնի Ավանշահին, թե՞ Երևան բնակավայրի այդ ժամանակի տերերից մեկ ուրիշին, առայժմ դժվար է ճշտել:

## ՀԱՄԱՆ-ՁԱԼԱԼԻ ՉԻՆԱՆՇԱՆԸ



Հայոց Արևելից երկրամասը՝ պատմական Արցախը, իր բարձրագահ լեռներով, իր ազատատենչ որդիների ուխտով, երբևէ գլուխ չի խոնարհել որևէ նվաճողի առջև: Թշնամիներն արճախում գայլերի պոտոր գետի պես եկել են Արցախի վրա, բայց ծեծված, թրջված կատվի նման՝ պոչերը ոտքերի մեջ առած, գլխապատառ փախել են, որ կարողանան փրկվել:

Երկրամասի իշխանավոր տերերը, որ սերում էին Հայկյան տոհմի Առանշահիկներից, թշնամիների դեմ մղած դարավոր կռիվներում մաս-մաս կորցրեցին հայրենի հողերը հյուսիսում, արևելքում, բայց 11-րդ դարի կեսերին, երբ Մայր հայրենիքում թշնամիների հարվածներից կորսվեց անկախությունը, Արցախ աշխարհում այն կարողացան պահել:

12-րդ դարի երկրորդ կեսին Ներքին Խաչենում իշխում էր Վախտանգ-Տանգիկը: Նրա իշխանատիրույթի մայրաքաղաքը Խոխանա բերդն էր, իսկ իշխանատոհմի հոգևոր կենտրոնը՝ Գանձասարը:

12-րդ դարի 80-ական թվականներին Ջաքարյան Սարգիս Բ-ն, սկսելով Հայաստանի անկախության համար պայքարը, դեռևս իրենց անկախ կամ կիսանկախ վիճակը պահպանած հայ իշխանների ուժերը միավորում էր ոչ միայն քաղաքական ճանապարհով, այլև ազդեցիկ իշխանական տների հետ խնամիական կապեր հաստատելով: Նա իր դուստրերից Դովին ամուսնացրեց Վերին Խաչենի իշխանաց իշխան Հասան Ա-ի, Վանենուն (հայտնի է նաև Նանա անունով)՝ Լոռու Կյուրիկյան Աբաս քազավորի, Նրջիսին՝ Գսելի Մամիկոնյան-Համազասպյան իշխանական տան իշխանագլուխներից մեկի հետ, իսկ Խորիշահին կնության տվեց Ներքին Խաչենի իշխան Վախտանգ-Տանգիկին:

Վախտանգ-Տանգիկի և Խորիշահի որդին ու իրավահաջորդը նրանց ավագ որդին՝ Հասան-Ջալալն էր: Նա հորը հաջորդեց 1214 թվականին: Հայրենասեր իշխանապետի գործունեության սկզբնական 20 տարիներին, մինչև մոնղոլ-թաթարների նվաճողական արշավանքները, բարձրացավ իշխանատիրության տնտեսական հզորությունը, ծավալվեց մշակութային աննախընթաց վերելք: Հասան Ջալալը մեծ խորաբափանցությամբ ճկուն քաղաքականություն ծավալեց թաթար-մոնղոլների տիրապետության շրջանում և հիմնականում գերծ պահեց իր իշխանատիրության ավերածություններից: Մոնղոլ նվաճողների բարեհոգի վերաբերմունքին արժանանալու նպատակով՝ նա 1236 թվականին իր դուստր Ռուզուբանին ամուսնացրեց մոնղոլ գորավար Չարմաղանի որդի Բորա-Նոյինի հետ:

Մոնղոլների իշխանության հաստատումից հետո՝ 1230-ական թվականների վերջերից, Հասան-Ջալալը դուրս է բերել իր իշխանատիրությոնը Ջաքարյան Ավագի ենթակայությունից, այն դարձրել ինքնօրեն վարչական միավոր՝ հարկատու ուղղակի մոնղոլներին: Հասան-Ջալալն ինքն իրեն կոչում է «ինքնակալ բարձր ու մեծ Արցախական աշխարհի, ինքնակալ Խոխանաբերդի»: Ժամանակակից հիշատակությունների մեջ Հասան-Ջալալը պատվվում է «ինքնակալ», «արքա», «բարեպաշտ արքա», «թագավոր» տիտղոսներով, որոնք բնավ էլ ձևի համար չեն օգտագործվել, այլ տրվել են Արցախական աշխարհի կողմնակալ Հասան-Ջալալին:

Հասան-Ջալալի շինարարական գործունեության զլուխգործոցը Գանձասարի վանքն է: Հոյաշեն այս կառույցը համարվում է համաշխարհային մշակույթի գանձարանը մտած հայկական հինգ ճարտարապետական հուշարձաններից մեկը, հայ ճարտարապետության հանրագիտարանը: Կաթողիկե եկեղեցու կառուցումը 1216 թվականին սկսել են Հասան-Ջալալը, մայրը՝ Խորիշահը, կինը՝ Բաղաց թագավորի դուստր Մամբանը: 22 տարի է տևել շինարարությունը: Եկեղեցու օծումը տեղի է ունեցել 1240 թվականի հուլիսի 22-ին, Վարդավառի տոնի օրը, բազմահագար հյուրերի մասնակցությամբ:

Հասան-Ջալալի տոհմի զինանշանի մասին ոչինչ հայտնի չէ: Իսկ ահա իր՝ Հասան-Ջալալի զինանշանը, փորագրված է Գանձասարի գավթի հյուսիսային մուտքի վերևում, շրջակալի երկու կողմերում: Պատկերված են դեպի իրար կողմ շարժվող երկու առյուծներ: Կենդանիները պատկերված են կողքից՝ հարթաքանդակ եղանակով: Քանդակագործն ընդգծել է կենդանիների իշխանատենչ, կամային

հատկանիշները, որոնք արտահայտված են բացված երախով, կատաղի աչքերով, դեպի վեր ցցված պոչերով, սուր մագիլներով: Պետք է նկատել նաև, որ եթե շլինեն կենդանիների վզի ակոսավոր փոսիկները, որոնք ներկայացնում են առյուծների բաշերը, նրանց կարելի է շփոթել ցանկացած կենդանու, հատկապես գայլերի հետ, քանի որ անհավաստի են պատկերված առյուծների գլուխները: Իրար մոտեցող առյուծները հայր ու որդի Հասան-Ջալալն ու Աթաբեկն են: Անգամ համոզված կարելի է պնդել, որ Հասան-Ջալալը ներկայացված է ձախակողմյան պատկերում, որտեղ առյուծի դիմաց փորագրված է վեցաթև աստղ՝ իշխանության նշանը:

Չույգ առյուծների այս պատկերը, հավանաբար, դաջված է եղել նաև Հասան-Ջալալի դրոշին, իսկ հետագայում փոխանցվել է Աթաբեկին:



## ԱՌԻՆՁԻ ՉԻՆԱՆՇԱՆՆԵՐԸ

**Ա**բովյանի տարածաշրջանի Առինջ գյուղի մոտ պահպանվել են բերդի մնացորդներ:

Բերդապարսպի ստորին շարքերը մասամբ շարված են անտաշ, իսկ վերին շարքերը և մուտքի հատվածը՝ կոփածո սրբատաշ քարերով:



Բերդի ներսում կան տների և եկեղեցու ավերակներ: Բերդի տարածքում պահպանվել են նաև միևնույն՝ 1501 թվականին պատրաստված երկու զինանշան:

**Բերդի մուտքի զինանշանը:** Այն փորագրված է մուտքի

բարավորի երեսին: Միակտոր քարի ներքևի հատվածը զոգավոր մշակում ունի: Ներքին մասում կոր է գծվել, որով ստեղծվել է կիսաշրջան կամ կլիսագնդի պատկեր: Կիսագնդի վերևում պատկերված են վիշապներ, որոնց գլուխները քարի կենտրոնական հատվածում են: Բացված երախները համաչափորեն հպված են իրար, յուրաքանչյուրի բերանում երևում են չորսական իրար սեղմված ատամներ (երկուսը՝ վերևում, երկուսը՝ ներքևում), որոնց արանքում տեսանելի է լեզուն: Կլորավուն գլուխների կենտրոնական մասում տեղադրված են նշաձև աչքերը, զլխի վրա պատկերված են երկու փոքրիկ կոտողներ, որոնք թագի տպավորություն են ստեղծում: Գլուխների շարունակությունը կազմող հզոր մարմիններն իրար վրայով անցնելով՝ հպվում են կիսագնդին և, արդեն քարի վերին մասում երկրորդ զալարը տալով՝ սրածայր պոչով ձգվում են մինչև քարի ուղղահայաց եզրերը:

Վիշապները պատկերված են հարթաբանդակի եղանակով, իրականացված են առանց մանրամասների ընդզծման, բայց խոսուն ու արտահայտիչ են, և թվում է՝ աչքերից հուր է ցայտում:

Կիսաշրջան-կիսագնդի առկայությունը պատկերային համակարգում վերջինիս զինանշանային հաստատումն է:

Ջինանշանի կոնկրետ պատկանելությունն անհայտ է: Մուտքի բարավորի աջակողմյան հենարան քարին փորագրված արձանագրությունից պարզվում է, որ վիշապներով զինանշանը 1501 թվականին ձևավորել է Մանվել քարգործը:

**Ստեփանոս եպիսկոպոսի զինանշանը:** Բերդի տարածքում շարաքարի երկու բեկորների վրա քանդակված է դիմահայաց, ճանկող արծիվ:


Արծիվը կիսաբաց թևերի եզրերով, հզոր պոչով հենված է գետնին և ճանկերով ողնաշարաջարդ է անում ինչ-որ կենդանու (վերջինս թեև ամբողջովին ջարդոտված է, բայց, ամենայն հավանականությամբ, գառ է): Արծվի գլուխն, ըստ պահպանված մասի, եղել է կլոր, մարմնի վերնամասն



ու կործքը ձևավորված են իրար վրա շարված եռաշար ումբափոսիկներով: Թևերի մնացած հատվածները ձևավորված են եռաշարք ուղղահայաց զուգահեռ փոսիկներով, իսկ ոտքերը՝ զուգահեռ բարակ գծերով: Ջինանշանն իրականացված է կլոր քանդակի եղանակով:

Արծվապատկեր զինանշանը երեք կողմից առնված է երկաթազիր արձանագրության շրջանակի մեջ: Ահա այն. «Ստեփանոս եպիսկոպոս նկարող յիշեցեք, ի թվին ՋԾ (1501 թ.)»:

Արձանագրությունից պարզ չէ, թե ով է այս Ստեփանոս եպիսկոպոսը: Հնարավոր է, որ այս Ստեփանոս եպիսկոպոսը 1501 թվականին հաստատվել է Առինջի բերդում, նորոգել բերդը, այնտեղ գտնվող եկեղեցին, կառույցները և փորագրել է տվել բերդի վիշապներով և իր՝ ճանկող արծվի զինանշանները:



## ՄԵԼԻՔ ԵԳԱՆԻ ՁԻՆԱՆՇԱՆՆԸ

**17**-18-րդ դարերում Արցախական աշխարհի երբեմնի հզոր իշխանատիրություն ձևավորվեցին հինգ մելիքություններ, որոնք իշխանատիրությի նոր ձև էին: Դրանց թվում էր նաև Դիզակի մելիքությունը:

Դիզակի մելիքության տարածքն ընդգրկում էր նույնանուն լեռներից մինչև Արաքս ընկած հողերը և Հասան-Ջալալի երբեմնի հզոր իշխանատիրությի մասն էր կազմում:

Դիզակի իշխանավորները Մելիք-Եգանյաններն էին: Այս իշխանատոհմի ծագման և Խաչենում հաստատվելու մասին հայտնի է հետևյալը. նրանք սերում են Լոռի գավառի Լոռիս-Մելիքյաններից: Ընտանեկան ընդդիմություն է ծագել տոհմի երկու ներկայացուցիչների՝ Մելիք Էլիզբարի և Մելիք Եգանի միջև՝ հողային ժառանգության կապակցությամբ: Մելիք Էլիզբարն ուժով տիրել է Մելիք Եգանի հողաբաժնին՝ Փամբակի ձորին և Լոռիի մի մասին: Չկարողանալով ընդդիմանալ Մելիք Էլիզբարին՝ Մելիք Եգանը 17-րդ դարի սկզբներին իր ամբողջ գերդաստանով, ժողովրդով հեռանում է Լոռուց և, կտրելով Արցախական աշխարհը՝ հաստատվում է Դիզակ գավառում:

Մելիք Եզանի տոհմաճյուղի մասին Տող գյուղի Սուրբ Հովհաննես եկեղեցու խաչակալի արձանագրությունից հայտնի են հոր՝ Ղուկաս վարդապետի, մոր՝ Մարիամի, եղբոր՝ Արամի, քրոջ՝ Խանումի, կնոջ՝ Խանումի, որդիների՝ Արամի, Եսայու, Բաղդամի, Վերտի և այլ ազգականների անունները:

Հայրը՝ Ղուկաս վարդապետը և որդին՝ Մելիք Եզանը, ձեռնարկում են նոր իշխանատիրության վերաշինությունը: Ջբաղեցնելով մի շարք վարչական պաշտոններ՝ ի վերջո Մելիք Եզանը հաստատվում է Դիզակի մելիքական պաշտոնում: Նա մայրաքաղաք է դարձնում Տող գյուղը, իսկ հոգևոր կենտրոն՝ Գտիչի վանքը, որի առաջնորդ է նշանակում հորը՝ Ղուկաս վարդապետին: Վերջինս նորոգում է վանական համալիրը և միաբանություն հաստատում այդտեղ:

Մելիք Եզանն ամրացնում է Տող գյուղը, կառուցում պաշտպանական կառույցներ: 1707 թվականին գյուղի կենտրոնում կառուցվում է նրա ապարանքը: Այն ի սկզբանե ունեցել է բրգավոր շրջապարիսպ, որը մասամբ պահպանվել է դարպասի հետ միասին: Շենքը կառուցված է սրբատաշ քարով, երկհարկանի է, ներքին հարկը քարածածկ, վերին հարկն ունի պատշգամբներ: Գյուղի բարձրադիր թաղում Մելիք Եզանը կառուցել է Սուրբ Հովհաննես եկեղեցին, որը ծառայել է որպես Մելիք-Եզանյան իշխանատոհմի տապանատուն:

Մելիք Եզանի իշխանության ժամանակահատվածը հանրակազմ ազգային և՛ մտափայլատակումների, և՛ խռովքի ծանր ժամանակներին: Մի կարճ պահ փայլատակեց Դավիթ Բեկի ստեղծած հայկական անկախ իշխանապետությունը, որի դրոշի տակ կռիվներ մղեց նաև Մելիք Եզանը: Այնուհետև գոյատևման համար նա մշտական բախման մեջ էր թուրքական թափառիկ ցեղերի հետ: Այդ իրադրության մեջ հանդես բերելով դիվանագիտական հեռատեսություն՝ Մելիք Եզանը ընդունում է Պարսկաստանի Նադիր շահի գերիիշխանությունը: Նադիր շահը 1736 թվականին նրան շնորհում է խանի տիտղոս և նշանակում Արցախի հինգ մելիքների գերագահ իշխան, որը իրավունք էր վերապահում նրան հավաքելու և շահի գանձարան հանձնելու մելիքությունների՝ ժողովրդից գանձվող հարկերը: Փաստորեն, այդ քայլով ապահովում է նրանց կիսանկախ վիճակը և Արցախի մելիքությունների հողերը զերծ է պահում պարսկական ոտնձգություններից:

Մելիք Եզանի օրոք էր, որ Արցախական աշխարհում իր նենգ գործունեությունը ծավալեց հայկական մելիքությունների մեծագույն թշնամին՝ թուրք Իբրահիմը: Այս մարդակերի զոհերը դարձան բազմա-

թիվ հայորդիներ, ինչպես նաև Մելիք Եզանի տոհմի շատ անդամներ: Եվ այդ նաև այն պատճառով էր, որ 1744 թվականին իր մահկանացուն կնքեց մեծ հայրենասեր ու քաջամարտիկ հայը՝ Մելիք Եզանը, իսկ նրա հաջորդները չկարողացան դիմագրավել Իբրահիմի խարդավանքներին: Մելիք Եզանին քաղեցին Տող գյուղի տոհմական տապանատանը և գերեզմանաքարին փորագրեցին.

Այս է տապան քաջ իշխանին  
Եկան անուն մեծ Մելիքին,  
Որ է որդի բարեպաշտին  
Դուկաս անուն վարդապետին:  
Եղև սիրեցեալ ամենայնին  
Նատիր անուն քազատրին:  
Տիրապետեց սայ ի երկրին  
Ի Աղուանից ի նահանգին  
Յոյժ պատուեցաւ պարսից ազգին  
Քան զիշխանս հայոց երկրին...

ՌՃՂԳ (1744):

Մելիք Եզանը, որ ինչպես տապանագիրն է հաստատում, տիրում էր բուն Աղվանքից՝ Քուռ գետից մինչև Արաքս ամբողջ երկրամասին և հայոց երկրի իշխանն էր, ուներ իր իշխանությանն արժանի զինանշան: Մեզ հասած օրինակը պահպանվել է Կավաքավանքի եկեղեցու ներսում: Եկեղեցին գտնվում է Տող գյուղի մոտ, Իշխանագետի մի լայնանիստ և բարձր բլրի գլխին: Այն վերակառուցվել է 1742 թվականին, երբ Մելիք Եզանը գտնվում էր իր փառքի գագաթնակետին:

Չլինանշանում պատկերված է երկգլխանի արծիվ: Թռչնի մարմինը վահանաձև է: Մարմնի վերնամասից դուրս են գալիս երկու համաչափ, աղեղնաձև երկար վզեր, որոնք ավարտվում են կլոր գլխով, ընդգծված աչքերով ու սուր կտուցով: Արծվազուխների վրա եռանյուղ թազեր են: Թռչունը հենված է եռանկյունաձև պոչի վրա: Նույն համաչափությամբ մարմնի վերնամասից մինչև պոչն են իջնում ներքևում սրացող թևերը: Թռչունը ձախ ոտքի ճանկերով թևի վրա պահում է գնդավոր գլխով իշխանության նշանը-մականը, իսկ աջ ոտքի ճանկերով թևի վրա պահում է փոսիկավոր խաչը՝ հոգևոր նշանը:



Մելիք Եգանն իր զինանշանի համար ընտրելով երկգլխանի արծվի պատկերը, հավանաբար, հաստատել է իր կապը Մամիկոնյան-Համազասպյան իշխանատան հետ: Թեև պետք է նկատել, որ հակառակ Մամիկոնյանների երկգլխանի արծվի, որը մագիլների մեջ բռնել է գառ, այստեղ արդեն արծիվը մագիլներում պահում է աշխարհիկ ու հոգևոր իշխանության նշանները՝ մականը և խաչը:

Մելիք Եգաննի զինանշանը որոշ նմանություն ունի նույն ժամանակաշրջանի ռուսական գերբանշանի հետ, որտեղ առկա է գրեթե նույնական պատկերը, միայն այն տարբերությամբ, որ ռուսական արծիվը թևաբաց է, և գլուխների արանքում առկա է ռուսական կայսրության թագը:

**ՏԻԳՐԱՆ ՀԱՅԱԶՆ**

**ՀԱՅԿԱԿԱՆ  
ԻՇԽԱՆԱԿԱՆ  
ԶԻՆԱՆՇԱՆՆԵՐԸ**

Խմբագիր՝	Հրաչյա Պետրոսյանց
Չնավորումը, լուսանկարները՝	Հեղինակի
Համակարգչային շարվածքը, տեխնիկական	
և գեղարվեստական խմբագրումը՝	Արգիշտի Պետրոսյանցի

Ստառագրված է տպագրության՝ 26.02.2005. :  
Տպաքանակ՝ 500:

«Տիգրան Մեծ» հրատարակչություն, Երևան, Արշակունյաց 2



